

ROMAN

vdwa Paul gv Siti Jinam

Mintamchonam

Paul gv Roman vdwa siti lvknam si ninyi Rom lo gvrja nyi vdwa kaalwk la ridubv vla rungnampanam am lvkto. Ninyigv rungnampanam jvngv kudungkua nga Kristan vdwgv aralo richore mvngtoku, okv vbvrikunamv bunugv ridurripa kunam lokv, Spain lo vngdung toku. Hv ninyigv kristan am mvngchin la mvngjwngnam am okv oguaingbv kristan singkurrikur bv risvdosv vdw um lvktoku. Kitap gv doin gaam dookidoak pvvnam si takloyangv Paul gv doin minji kunamv doolwkdu.

Rom gv gvrja nyi vdwa kumrwksinam kokwng loku okv hv bunugv lvgabv ninyigv kumji nama bunu vdwa mindung la, Paul siti gv atukalv nga um siti lo lvkjito: “Gamlv ngv Pwknvyarnv gvlo oguaingbv nyi vdww tarwkbak jvbv atuake lokv ataranya gobv mvngjwng la doosvdaksv vdw: um kaatam nama lvkjito” (1:17).

Paul vbvrikunamv soogv atukalv gamlv sum alv yabv minlwk dvvto. Nyi mvnwng ngv, Jius jvka okv Jentail jvka anyibabwng ngv, Pwknvyarnv gvlo tarwkbak bv doorungdakrung dubv rirungdo, vkvlgavbolo mvnwng ngv rimur gv jwkrw arwng lo lvkinbv dooladakla ridu. Jisu kristo gvlo mvngjwngnam lokv nyi ngv tarwkbak bv Pwknvyarnv gvlo doodunv. Paul lvkdvto Pwknvyarnv gvlo soogv anwnvbv doodubv, Jisu kristo gvlo mvngjwng sidula anw bv singnam

am paanamv. Sinamyaanam okv rimur gv jwkrw lokv Pwknvyarnv gv Dowv laalin jila kula riku nvingv Pwknvyarnv gvlo mvngjwngnv vdww himpu lakula riduku. Chapter 5-8 gv arwng lo Pwknvyarnv gv Pvbv okv Pwknvyarnv gv Dow gv jwkrwv mvngjwngnv vdwgv turnam lo doodunv vla Paul vbvka japta laka ritoku. Vbvrikumamv Apostol vdww tvvka rapduku nyi mvnwng lvgabv jius okv Jentail vdww Pwknvyarnv gv mvngnam bv kaajwk yachok bv dooredw vla tvvkala ritoku. Hv mintarminya bv mingkunam si Jisu kristonyi Jius vdwgv tulatua namsi baagonv Pwknvyarnv gv mvngnamv mvnwng nyi mvnwng aralo Pwknvyarnv gv anyuaya ngv Jisu kristo ara lokv pwchila laalwk pnv mvngma bv tulatua nam sum minji laku rito, okv hv vbvka mvngjwng toku jius vdww tulatua kila Jisu nyi ribv kumareku. Lvknjong aku Paul kristan turnamv oguaingbv bv singsvrisv vdww ho lvkwnglo lvkto, asarjvbv minjenam si kvvbigv lvkobbv paami sijiku lamtv agungaram rijisingji nam lvkwnglo lvkto. Hv vkvnv mintukmilv go laalinla Pwknvyarnv gvbv riji modubv, kristan gv sorkari lo kudungkua risv okv ajinanying ngaka okv mvn-grum aralo mvngkwhingkw minsu dubv minto. Hv atubogv doin minam gv lvko bvku siti am lvngam duku okv gaamgo Pwknvyarnvnyi hartv toku.

Arwng lokv darlinnam

Mintamchonam okv atukalv *(1:1-17)*

Chinggodogo nyia gv ringlinbaalin dubv rirungnam *(1:18-3:20)*

Pwknvyarnv gv ringlinbaalin kogv lamtv *(3:21-*

4:25)

Kristo lo anwnv turnam (5:1-8:39)

Israel v Pwknvyarnv gv rungnampanamv (9:1-11:36)

Kristan gwnggvrigrvnam (12:1-15:13)

Lvknyunglvknya okv atunvgv kumrwklwtak sinam (15:14-16:27)

¹ Paul lokv, apostol akobv gaknam Kristo Jisu gv pakbu akobv rinv okv alvnnv yunying minggo kardubv Pwknvyarnv gv goklin kunamv.

² Pwknvyarnv gv alvnnv yunying ngv krimklu lokv ninyigv nyijwk lo milv pvvto, Darwknv kitap lo vbv lvklwk toku. ³ So si ninyigv umvuu lvkwnglo, ngonugv Ahtu Jisu kristo: vbv adw-namar bv, Hv Dabid gv husi ara lokv bvnglin toku; ⁴ Ninyigv darwknv gv Dow hvvrong jvjvbv, kairungnv jwkrw lokv kaatam la Pwknvyarnv gv Kuunyilo rinam lokv siku nvngv turkur toku. ⁵ Ninyigv lokv Pwknvyarnv ngam Apostol ako bv ridubv kristo gv amin lo jito, vbv orto kumnam lokv diringmooku gv nyi mvnwnng nga rigv mola mvngjwng modu kubv okv tvnvgobv rimu dukubv ritoku. ⁶ Si Rom lo doonv, yvnyi Pwknvyarnv gv Jisu kristo gvbv gokpvdw nonua ka mintak dunv. ⁷ Okv vkvlgabv Rom lo doonv Pwknvyarnv gv paknam nyi dvdv nga okv ninyigv atubogv gvbv gokunam am ngo lvkdunv:

Ngonugv Pwknvyarnv Abu okv Ahtu Jisu Kristo gv anyuaya okv sarsopoyo ngv nonu gvlo jilwk yilaka.

Umbonyikv vla kumnam

⁸ Atuakebv, Jisu kristo amin lo nonu mvnwng lvgabv ngokv Pwknvyarnvnyi ngo umbonyikv vdunv, ogulvgavbolo nonugv mvngjwng nam lkwng bv nyiamooku mvnwng ngv tvvpa nyadung duku. ⁹ Ngo ogugo mindudw sum jvjv dunv vla ngoogv Pwknvyarnv tvvyakaya do—ninyigv Kuunyilo lkwnglo alvnnv yunying nga ngoogv japgo karla haapok lokv ridum jikunamv Pwknvyarnv ngv. Pwknvyarnv ngv chindu ngo nonua mvngpa kidunv ¹⁰ Ngoogv kumri dwkibv kumpa dunv. Nonugv dooku lo ngam vjak vngmuchamu nam lvgabv Pwknvyarnvnyi ngo ninyigv mvnglwkkalwk bvka vla tvvka doonv. ¹¹ Nonua ngo achialv bv kaanwng dunv, vkvlgavbolo darwknam boktalwkjinamv gwllwk alvbv nonu gvlo doolwk jimu dukubv. ¹² Ngo mindunv si oguvvbolo bunyino la okv ngo lvvyin akinbv mvdur minsu lareku, ngoogv mvngjwng lokv nonu okv nonugv mvngjwng lokv ngo.

¹³ Nonu mvnggap runglaka, ngokv ajin vdwa, si ngo nonua kaarwk sidubv achialvgo gwngkwng toku, vbvrijvka rigv nyikibv vbv vnglinrilin paamabv ribvto. Jentail kvvbi vdwa ngoogv rinam aingbv, nonugv ara loka mvngdin mola aamu dukubv mvngdu kunv. ¹⁴ Ngo gvlo nyi mvnwng lvgabv, chinvpanv jvka okv chinvpanv majvka, puripupanv jvka okv puripupanv majvka minsvriv go doodunv. ¹⁵ Vkvlgabv ngo nonua okv Rom lo doonvdaknv vdwaka Alvnnv Yunying nga japji nwngdunv.

Gamlv gv jwkrw ngv

16 Gamlv am ngo alvjvrv rungbv mvngjwng rungduv; si Pwknvyarnv gv jwkrwv mvngjwng la doobu dvdv nga ringnam lvgabv, atuake bv jius vdwa okv Jentail vdwaka ringlin reku. 17 Holvgabv Pwknvyarnv atubongv nyi vdwa ninyi gvlo tarwkbak dukubv mvkunama um gamlv ngv kaatamdo; si mvngjwngnam lokv atuake gvngv laala yikula ataranya gobv rire. Darwknv kitap ngv vbv mindu, “yvvnyiv Pwknvyarnv gvlo tarwkbak bv doodudw mvngjwng nam lokv turla dooreku.”*

Nyia rigakpanam

18 Pwknvyarnv gv haachi namv rimur dvdvlo okv alvmanv nyi vdwgv jvjvrungv am chimu madubv mvturla oogv alvmanv lamtv lo rigvrv vdwgv lkwngbv nyidomooku tolo gvngv kaatam la ritoku. 19 Pwknvyarnv bunu vdwa mvriririt toku, ogulvgavbolo Pwknvyarnv gv lkwnglo ogunv chinsv vdw bunu vdwv chinpu bv chinla toku, vkvlgavbolo Pwknvyarnv atubongv um chinpu dubv mvjitoku. 20 Krimklu lokv nyiamookua pwklinyarlin yilo gvngv laala yikula, ninyigv kaapa manam raying nga, ninyigv turbwngv jwkrw lokv okv ninyigv Darwkrungv doodung sunv so anyi lokv, rvbwngching bv kaabwk toku; bunu vdwa soogv ogumvwnvng si Pwknvyarnv gv mvpvkunv mvngmu toku. Vkvlgabv ho nyi vdwa yvvnyika ayeako namgo kaamare! 21

1:16 1:16; Mk 8:38 **1:17** Heb 2:4 * **1:17** Pwknvyarnv gvlo tarwkak bv doonam lokv mvngjwng ngv turla dooreku; VmaloMvngjwng lokv Pwknvyarnv gvlo tarwkbak bv turla dooreku. **1:21** Epe 4:17,18

Bunu vdww Pwknvyarnvnyi chindo, vbvrijvka bunu vdww Ninyigvbw mvnglwkw sula mvngdv jimadu, vmajeka ninyia umbonyikv vlaka mimadu. Vbvmayabvku, bunugv tuktumv mvngdung kaama nvbv riduku, okv bunugv tuktum arochoko lo kanvtwng yalwk duku. ²² Hv bunu mindu bunu vdww chinvpanv ngv vdu, vbvrijvka bunu vdww nyiposojo nvgobv ridu. ²³ Sikamajinv Pwknvyarnvnyi kumji koloya, bunu vdww siyajinv nyi jvbw kaadubv mvringmvma tvla vmalo pvta vmalo svnwngsvmin vmalo doojingburu am mvringmvma tvla kumnya la ridu.

²⁴ Okv vkvlvgabv vkvnnv nyi kasingkanyaknv rilwkdolwk dubv haapok mvngnv bunu vdwa Pwknvyarnv jilwk jito, okv bunugv ajinanying lokv hinyinghiru rinam lo ridukalam mola rimu duku. ²⁵ Mvvnamm lvgabv Pwknvyarnv lvkwnglo jvjvrungnv nga bunu vdww mvlomvk jila ritoku, Pwknvyarnv ogugunyi yarpvdw bunu vdww um kumlajola rijiyala ritoku, Pwknvyarnvnyi dvbvs-ingtambv hartvbamtv yabv la rise yanga! Amen.

²⁶ Vkvlgabv bunu vdww so vbvrikulo, Pwknvyarnv bunua hinyinghiru sakduk namlo jilwk toku. Nyimv vdwwka bunugv nyimvnyilo gv ridung jvjvlo rimisinam sum riku mabv nvgwngbv rimisingmi sinyala riduku. ²⁷ Oogv apia bv nyilo vdwwka nyimvnyilo gv ridung jvjvlo riku mabv nvgwngbv rimi sinyala riduku okv ajinanying lo sakduk kalam minsula ridu. Nyilo vdww vbv ajinanying lo vkvnnv rimisila rinamv, okv kaka kunamv

bunu awgv rimur nam lvgabv bunu atubogv aolo mvrit kosv nga hv bunu laalwk sila ridu.

²⁸ Ogulvgavbolo oogv nyi vdwv Pwknvyarnv gv lkwnglo jvjvrungnv chinampanama tuktumlo tvvgap pvvla risv nga tvvmarima kolo, bunu vdwa alvmanv mvngnampanam am hv jilwk pvvto, vkvlgabv bunu rima svnga riniadaknia la riduku. ²⁹ Bunu vdwv nvgwng mvnwng gv rimurrichvnam, alvmanv, gumpwngnam okv rimur mursik sinam dvdv ngv, doolwkdaklwk nyala riduku, bunu vdwv kavtavnam, mimisinam, pamisinam, kupmisinam, okv kvvbia hirukaya modu bv gwngnam. Bunu vdwv japsijapik laka ridu, ³⁰ okv ajinanyingnga tvvmur dubv mindu, bunu vdwv Pwknvyarnvnyi mvngnwng madu, mvngdv dubv rimadu,[†] kai mvngsunam, okv goosunam; bunu vdwv alvmanv lamtv lo kaiyago riso mvngdu; bunu vdwv bunugv anvabu gv mingku bv vngso mvngmadu; ³¹ bunu vdwv mvngdung kaamado; bunu vdwv bunugv milvpvnam lo rimadomadu, okv bunu kvvbi lvgabvka ayakaapa nam okv aiamarnam kaatam madu. ³² Hv bunu soogv lamtv so ribudakbu vdwv sinam lo paadunv vla Pwknvyarnv gv Pvbv lo minam am chindu. Vjvtikmabv, hv bunu vdwnvgo riji nvnga ka ridungdu, vbvritola bunu kvvbi gv rinam aka bunua tulwk mingv laka ridu.

2

Pwknvyarnv gv jwngkadaka nam

[†] **1:30** Pwknvyarnvnyi mvngnwng madu, mvngdv dubv rimadu; Vmalo Pwknvyarnvnyi mvngnwng manamv, okv mvngdv manamv.

¹ Ngokv ajin nonuno, kvvbia jwngkadaka dunvri? Nonu yvvnv bv rijeka, nonu miyiminggi svgo kaama rinvpv. Vkvlgabv vdwlo nonuno kvvbia jwngkadaka dudw okv oogv apia bv bunugv rinam am ridubolo, nonuno atubonga alvmabv miyakaya lwksudu. ² Ngonu chindu Pwknvyarnv gv vkvnv vbv gwngnv nyi am ninyigv jwngkadaka dunam si vv riching ngv. ³ Vbvritola, ngokv ajin, nonuno kvvbi lvgabv vkvnv ogunv jwngkadaka am kaatorito kula! Nonu ka Pwknvyarnv gv jwngkadaka rikunyi ho nonu miring sula rikudw mvngdu nvre? ⁴ Vmajeka ninyigv kairungnv aya nga, saktv nga, okv reniak ka nonuno miyakaya sula ridu. Nonuno chinrungdu Pwknvyarnv ayanv, ogulvgavbolo Hv nam mvngdin modu kubv gwngdungla rigvdu. ⁵ Vbvritola nonu vdwv haapokv akortor la okv mvngdin nyola mabv ridu, vbvrinamv vdwlo Pwknvyarnv gv haachiagla tarwkbak rungbv jwngkadaka la kaatamla ririkunyi mvriririt svnga kaiyaya mola riduku. ⁶ Ngonugv ogugo ripvdakpv pvkudw vbvching nyichar mvnwng nga Pwknvyarnv rijo kunam amina jiri kunvpv. ⁷ Nyi meegonv albv ridungdakdungdu, okv hartv ngam madu, mvngdvkaadv nga, okv sika manv singdung nga madu; bunua Pwknvyarnv turbwng jinv singdung nga jire. ⁸ Kvvbi nyi ngv nabongdu okv tarwkbak namv ogudw um mvnggi madu, alvmanv ogudw umya ridu; bunu gvlo Pwknvyarnv ninyigv haachi okv dokcha nama

pwlwkre. ⁹ Hokaku hirukaya nga, okv achiapik ka yvvdw rimur dudw oogv rinw dwdv ngv paare, atuake bv jius ngv paachore okv koching bv Jentail vdwv paare. ¹⁰ Vbvritola yvvdw ogunv alvnnv dunvdw oogv rinw dwdv nga hartv namnga, mvngdvkaadv nga, okv mvngpua, Pwknvyarnv jireku, jius vdwa jichore, okv kochingbv Jentail vdwa jire. ¹¹ Vklvgavbolo Pwknvyarnv mvnwng nga lvkinching bv jwngkadaka dunv.

¹² Moses gv Pvbv lo Jentail vdwv dooma dunv; bunu vdwv rimurnv okv Pvbv agum lo nyekunv okv Pvbv lo jius vdwv doopvnnv; bunu vdwgv rimur am Pvbv lokv jwngkadaka dukunv. ¹³ Pvbv nga nyarung tvvnam lokv Pwknvyarnv gvlo tarwkbaknv nyi govv ridunv vnam kaama, vbvritola Pvbv lo ogugo lvkpvdw um tvvla riya bongv vv Pwknvyarnv gvlo tarwkbak bv riya dunv ¹⁴ Jentail vdwgvlo Pvbv kaama; vbvrijvka bunu vdwv vdwgo rilingvnglin dudw Pvbv lo oguaingbv gamki pvdw vbvching ridu, bunu vdwgvlo Pvbv doomajeka, bunu atubogv pvbv doosudu. ¹⁵ Bunugv rigvdogv namv bunugv haapok lo Pvbv ngv oguaingbv lvkpvdw vbvching kaatam la ridu. Bunugv mvngdwmvngying laknam vka si jvjvrung mvngdubv kaatam la ridu, bunugv mvngnamv lvko gunyi bunua yamdu okv lvko gunyi bunua ringya laka ridu. ¹⁶ Vklvgabv, ngoogv alvnnv yunying japgo nam lokv, ogubvrijvka Jisu Kristo lokv Pwknvyarnv ho Alu lo mvnwng gv mvngsi nvnga jwngkadaka rikunvpv.

Jius okv Pvbv ngv

¹⁷ Nonuno ogulvkwngbv? Nonuno atubongv jius gobv minsu dunv; nonuno Pvbv nga ming-gingla okv Pwknvyarnv gv lvkwnglo googing nvla ridu; ¹⁸ Pwknvyarnv nonua ogu rinwng modu nvdw nonu chindu nvre, okv ogunv tarwkbak pvdw nonu Pvbv lokv chilin la gakdu; ¹⁹ nonuno jvjvklvbv nyikching nvgv lvgabv nonu chigudabia rungre, loungv kanvparam lo doonv lvgabv doo-dunv. ²⁰ Agiama mintamn vnyiposo v lvgabv, okv puririsar nvngv chimapama nam lvgabv ridunv. Nonu oogv Pvbv jvjv arwng loka ridu, nonu chingkikpakik kunv bvka okv jvjvklv loka doonv bv ridu. ²¹ Nonu kvvbia tamsardu—nonuno ogubv atubonga tamsar suma dunv? Nonuno japgo kardu, “dvcho yoka”—vbvritola nonu atuv dvcho dunvre? ²² Nonu mindu, “nonuno yokarchokar yoka”—vbvritola nonu yolachola ridunvre? Nonu murti kumyoka—vbvritola no pwknvyarnvnaam am dvrik dunvre? ²³ Nonu Pwknvyarnv gv Pvbv doonam lvkwnglo googing nvla ridu—vbvritola Pwknvyarnvnyi hinying rilik jila ninyigv Pvbv am mvkmvrwk jidunv ²⁴ Darwknv kitap vv mindu, “nonugv jius vdwlokv Pwknvyarnvnyi Jentail vdwa alvmabv nyarjitari modunv vdu.”

²⁵ Vdwlo nonu Pvbv am tvvla ribolo, noogv ayakmvu lwknamv alam aanv gobv riyinppv; vbvritola nonuno Pvbv am tvvbotvlik nvgobv ribolo, noogv ayakmvu lwknam vv lvkoka lwkmanv aingbv riri nppv. ²⁶ Vdwlo Jentail vdvw, yvnyi ayakmvu lwkmabv, Pvbv am tvla ridudw hv bunua ayakmvu lwknam kaama mvngla Pwknvyarnv laarwk simabv rimare? ²⁷ Okv vkvlv-

gabv nonu jius vdwa Jentail vdvw miyakayare ogulvgavbolo nonuno Pvbv am mvkmvrwk jitungu, nonu vdvw lvkpv laka ridu okv ayakmvu laka ridu; Bunu vdvw ayakmvu go rima jeka bunu Pvbv nga tvla rila riyadu. ²⁸ Mvnwng gv aolo, yvvdw jius jvjv ngv, adwnamar lo ayakmvu jvjvbv ridunv? Adwnamar lo ayakmvu gnv bv ritola yvvdw akoka jius bv rinv nyi kaamare. ²⁹ Vbvritokula, jius jvjv nyi ngv vbvridu arwngching bv, yvvdw vkvnv haapok lokv ayakmvu bv ridunv, okv vkvnv vv Pwknvyarnv gv Dow gv kudungkua bv ridunv, Pvbv lvklwknam lokv rima dunv. Vkvpakv rinv nyi angv vv Pwknvyarnv gvlo hartvnam am laarwk sipadunv, nyi vdvw gvloma.

3

¹ Jentail vdwa jius vdvw ribin yanamgo doodure? Vmalo ayakmvu namv anyung doya namgo doodure? ² Achialvgo, jvjvklvbv, nvgwng mvnwng lamtv lo! atuake bv, jius lo Pwknvyarnv ninyigv Doina mvngjwng lwkla jilwk jito. ³ Vbvrijvka bunu vdwg v aralo meegonv mvngjwngjvjv kumanv sum ogu rire kudw? Sum vbvrikubolo Pwknvyarnv mvngjwngjvjv kuma bv riyikudw? ⁴ Vdwlaka vbv rimare! Pwknvyarnv mvvma rungmanv, nyi vdvw mvnwng ngv mvnvrnv gobv rijvka. Darwknv kitap ngv vbv mindu,

“Nonuno vdwloma mindu bolo tarwkbak bv kaatam rungdv rilaka;

vdwlo nonuno rikwngkw kunamgo
ridubolo noogv kvba nga riya yadubv
rirung tokuka.”

⁵ Vbvrítola ngonugv rimur rinam lokv Pwkn-
vyarnv gv tarwkbak ridung nga rwbwngching
yabv kaatam ribolo ngonu ogubv minre? Vdwlo
Hv ngonua mvrit jikubolo ngonuv Pwknvyarnv
rimurdu vla minla ridw? (Si soogv tvvdung
bv tvkala tvvsu dunv) ⁶ Vdwloka vbv rimare!
Pwknvyarnv ngv jwkma bolo, Hv oquaingbv nyi-
amookua jwngkadaka laridw?

⁷ Vbvrítola ngoogv jvjv manam lokv Pwkn-
vyarnv gv yunglit gv lvgabv ninyigv jvjv nga
abuyabv rwbwng modubolo? Ogulvgabv ngo
vjaklodvbv miyakayanamlo rimurnv gubv doob-
wng redw? ⁸ Vbvríkubolo, “Alv nvngv aarikacho
kvvlvgabv kvlai ngonu rimur laju” vla ogulvgabv
mima pvnv? Nyigonv, jvjvklvbv, achialvgo svbv
ngonua miyakaya la alvmanv bv ngonua nvl-
wkla mindung do! Bunu oquaingbv rirung pvdw
vbvching, bunu alvmabv miyakaya namv doore.

Yvvka darwk madunv

⁹ Vbvríbolo alvdu, ngonu jius vdww Jentail vdwa
alv yama dunvre? Ma vbvma!* ngo mvnwng nga
kaaka kunamv jius jvka okv Jentail jvka mvnwng
ngv rimur gv arwng lo akin bv ridu. ¹⁰ Vbv
Darwknv kitap ngv mindu:

“Soka yvvka darwk yanvgo kaama,

¹¹ yvvka chingkikpakik yanvgo

* **3:9** Jentail vdwa alv yama dunvre? Ma vbv oguka ma!; Vmalo
Jentail vdwa maatarbv alvmaya lare? Ma vbv akamapaka ma.

3:10 Miri 14:1-3; Miri 53:1-3

vmalo Pwknvyarnv nyi kumdu bv mvngnvgo
kaama.

12 Pwknvyarnv gv lokv mvnwnv ngv kinya duku;
Bunu mvnwnv ngv rimur lo vngroku;
tarwkbak ogudw yvvchin akoka rimadu, akin
godaka kaakuma.

13 Bunugv minam gaamv chumdwk gobv akomar-
ing duku;
alvmanv mvnamv bunugv riu am rikung
moduku,
okv alvmabv riji nvnga busukapa dubv,
bunugv gaam nabur lokv tabw gv
chumdwk aingbv ridu;

14 bunugv japnamv kvchakchakvrurv bv
beenam gobv ridu.

15 Nunu baapu alvbv minvmirvdu okv mvkidu;

16 bunu ogolo vngjvka alvmabv ridu okv mvk-
mvrwk pila kayu duku.

17 Bunu vdvw mvngpu gv lamtv nga chimadu,

18 vmabv bunu vdwgvlo Pwknvyarnvnyi
busu doola laarwksinam goka kaamado.”

19 Ngonu chindu yvvdw Pvbv arwnglo
doonv ngv Pvbv gv agiama lo ogumvnwnv nga
ridudakdu bv ridu, Pwknvyarnv gv jwngkadaka
namlo nyiamooku dvdv sum laalwk dukubv okv
nyia mvnwnv gv mvngnga jimi sinama ritor
duku ritoku. 20 Ogulvgavbolo Pvbv lo ogugo
dinchu pvdw um rinv nga yvnyika Pwknvyarnv
gv kaagialo tarwkbak nv gobv laalwk madunv;

3:13 Miri 5:9; Miri 140:3

3:14 Miri 10:7

3:15 Aij 59:7,8

3:18 Miri 36:1

3:20 Miri 143:2; Gal 2:16

ngonuv rimure oguvdw chindu bv Pvbv mvnam si mvdunv.

Ngonu Pwknvyarnv gvlo oguaingbv tarwkbak svngv

²¹ Vbvrítola vjak Pwknvyarnv gv lamtv nga nyi lvgabv oguaingbv tarwkbak bv vvpv svngvdw ninyi atubongv kaatam toku. Pvbv lokv oguguka kaama, Moses gv Pvbv okv nyijwk vdvw bunugv minam loka sum tulwk minggv toku. ²² Bunu vdwa Jisu kristo lo mvngjwng nam lokv Pwknvyarnv tarwkbak bv vvpvdu. Kristo lo mvngjwng la doonv dvdv nga Pwknvyarnv mvnwng nga svbv rito, ogulvgavbolo yvka mvnwng ngv angu siyanvgo kaama. ²³ Mvnwng ngv rimur kunv okv Pwknvyarnv gv ringji kugv nvchilo dooku mabv adukoyo kunv. ²⁴ Vbvrítola Pwknvyarnv gv anyu amin gv anyuaya lo oogv bunua ajarabi bv limukunv, Jisu kristo lokv tarwkbak bv ninyi lvkobv mvnwng nga doomin paamuduku. ²⁵⁻²⁶ Pwknvyarnv ninyia daan lwkji toku, vkvlgavbolo ninyigv oyi lokv† Hv kokwng lo yvvgv nyi vv rimur pvdw bunugv mvngjwng lokv ninya mvngnga nam paadu kubv. Hv darwknv gobv ridu vla kaatam dubv Pwknvyarnv sum rito. Atuake lo hv saktv nvgobv rila okv nyi vdvgv rimur am kaabokaalwk la rito; vbvrítola Hv vjvgv alu soka hv bunugv rimur am kiiyapaya la riduku, ninyigv darwknv nga kaatam dubv vla. Vbvrila svkvnv lamtv lo Pwknvyarnv ninyigv darwknama atubongv kaatam sula okv yvvdw

3:22 Gal 2:16 † **3:25-26** Ninyigv oyi lokv; Vmalo Ninyigv erin lwkjila siijinam lokv.

Jisunyi mvngjwng la ribu dvdv nga tarwkbak bv vvpv duku.

²⁷ Vbvrikunamv ogulvkwnglo ngonu goola nyodubv? Oguguka ma! Okv si ogu jvgv lvgabv kudw? Ngonu si Pvbv am tvvku lori? Ma, vbvritola ngonu oogv mvngjwng lokvnnv. ²⁸ Mvngjwng nam mvngchik lokv nyi vdvw Pwknvyarnv lo tarwkbak bv doodubv ngonuv mintarminya mintoku, okv Pvbv ngv oguv vpvdw ho vngkuriku lokvma. ²⁹ Vbvmalo soogv Pwknvyarnv si jius vdwgv Pwknvyarnv vmwng ngvre? Si Jentail vdwgv Pwknvyarnv bv rita madu nvre? Hv jemabv, hv vkvgv jvrung. ³⁰ Pwknvyarnv ngv akin mvngpvnv, okv Hv jius vdwa ninyigv atubogv lvkobv bunu vdwgv mvngjwng lokv tarwkbak bv vvpvre, okv Jentail vdwka bunugv mvngjwng lokv tarwkbak bv vvpvre. ³¹ Vbvrividunv si vbv soogv mvngjwng la rinam lokv Pvbv nga kayu rikudw? Ma, vkvnnv ma; vmabvya, Pvbv yanga ngonu gakbwng yadunv.

4

Abraham gv kaagv sidubv rinam

¹ Vbvrikunamv, ngonu oguv vla minladu, Abraham, ngonugv halung gv abu vre? Ninyigv rikivngki kunamv ogugukudw? ² Vkvgv rinam dvdv lokv Pwknvyarnv kaagelo tarwkbak bv vvpv kubolo, hv oguogu rinam dvdv lkwnglo googv svgovv ridu—vbvritola Pwknvyarnv gv kaagelo rimadu. ³ Darwknv kitap vv mindu, “Abraham Pwknvyarnvnyi mvngjwngto, okv ogulvgavbolo

ninyigv mvngjwng lokv Pwknvyarnv ninyia darwknv gobv laarwk sito.”⁴ Yvnyiv riduvngdudw um rijo ngam jidu, vbvritola hv bunua anyuamin jinam gobv mvngmadu; hv bunugv ogugo paadudw vv nyingnam lokv paadu.⁵ Vbvritola yvvdw mvngjwng lo mvngging dudw, rinamgwngnam lokv mabv, okv yvvdw Pwknvyarnvnyi mvngjwng dunv oogv rimur nvnga apaamanv nga alvmanv gobv minv, vkvgv so mvngjwng lokv Pwknvyarnv sapkamsapa la vvpvdu bunua ninyigv atubogv gvlo tarwkbak bv laalwk kunam lvgabv.⁶ Nyidam akonyi Pwknvyarnv tarwkbak nvgobv turwk sitoku ninyigv kudungkua rikunama miya kumabv v achialvbv mvngputo ho mvngpu nam lkwng bv Dabid svbv minto.

⁷ “Mvngpuv oogv yvvgv rigakpanam am mvngnga pvkudw,
yvvgv rimur vdwa mvngnga pvkudw!

⁸ yvnyvnyi rimur am Ahtu sapkamsapa namlo vvpv mapvdw vv mvngpuv!”

⁹ Soogv mvngpuv vla minamv Dabid yvnyvnyi ayakmvu lwknam mvngchik lvgabv mimwng pvnvre? Ma vbvrinam lokvma, si ayakmvu lwkmanam jeka. Ngonu Darwknv kitap lokv kaala kaju, “Abraham Pwknvyarnvnyi mvngjwngto, okv ogulvgavbolo ninyigv mvngjwng lokv Pwknvyarnv darwknv gobv ninyia laarwk sitoku.”

¹⁰ Vdwlo sum laarwk sipvnyv? Kvvlo Abrahamnyvnyi ayakmvu madv yilore vmalo ayakmvu ronga pvku are? Si kvvlo lokvku, kokwngloma.¹¹

Hv ayakmvu ropvku kokwng lo, okv ninyigv ayakmvu jinam nga kaatam la rito ogulvgabolo ninyigv mvngjwng lokv Pwknvyarnv darwkvn bv ninyia laarwk sitoku oogv richo pukua ayakmvua mvpvkunv. Okv vkvlgabv Pwknvyarnv lo mvngjwng la doonv dvdvgv Darwkchongjor gvnv abu bv Abrahamnyi mindunv okv ninyi gvlo gvngv darwk nvbv laarwk sidunv, hv bunua ayakmvu majvka laarwk sitoku. ¹² Hv ka yvvdw ayakmvu pvdw vkvgv abu bv ridukunv, si, yvvdw, ayakmvu minggv kunv gvbvka rinv, Abraham gv dootv madvyilo gvngv kvvlo gv mvngjwng la doodu kalam la donv hv ka ayakmvu pvkunam vkvgv abu bvka ridunv.

Pwknvyarnv gv milvnama mvngjwng lokv laarwk sinam

¹³ Abraham nyila okv ninyigv husi vdwa nyiamookuv ninyi gvbv rire vla milv jinama, hv vbv mvtoku, ogulvgabolo Abraham Pvbv am tvvnam lokvma vbvritola vkvlgabolo hv mvngjwng toku okv darwk kunam lokv Pwknvyarnv gvlo laarwk sila ritoku. ¹⁴ Pvbv am tvvnnv vdw sum Pwknvyarnv gv ogunv milvpvdw um jibolo, mvngjwng namsi anyung kaakumare okv Pwknvyarnv gv milv pvkunam vv ogubvka riku mare. ¹⁵ Pvbv vv Pwknvyarnv gv haachiak nvnga laalwk moludo; vbvritola ogolo Pvbv kaama pvdw, hoka Pvbv a tvvmabv ridung dubv riku kamadu.

¹⁶ Okv mvngjwng nga kaala yikula milv nam nga milin pvnv, vv Abraham gv singsit dvdv ngam Pwknvyarnv gv vbv anyuamin bv jinam

4:13 Atk 17:4-6; 22:17,18; Gal 3:29

4:14 Gal 3:18

4:16 Gal

gobv rirungdubv milv pvvjitoku—yvvdw Pvbv am tvvdudw o mvngchik gvbv ma, vbvritola yvvdw Abraham aingbv mvngjwng dudw holvgabvka jidu. Abraham ngonu mvnwng gv lvgabv yalu gv abu riduku; ¹⁷ Darwknv kitap v vbv mindu, “Ngo nam diringmooku mvnwng gv abu bv rimu pvkunv.” Vkvlgabv milv pvvnamv Pwknvyarnv gv kaagia lo alvnbv rito, yvnyi Abraham mvngjwng pvdw—Pwknvyarnv sikunvnga turmu toku okv oguguchin kaama nvnga ka gamki lokv doomu toku. ¹⁸ Abraham mvngjwng laku okv mvngtin toku, vdwlo ogu mvngtin pvvsvgo kaama jvka mvngtin pvvla rito, okv vkvlgabv “diringmooku mvnwng gv abu bv kokwng lo ridukubv rito.” Vjak vbv Darwknv kitap v minjidu, “noogv husiv nyido takar aingbv rire.” ¹⁹ Hvkvgv anying ngv lvnggo bv ritoku; vbvrijvka ninyigv haapok lo adwnamar bv vdwo nyikam kubvka ninyigv mvngjwng nam nga nyeka moma to, oogv adwnayak v sinro kubvka, Vmajvka vbvka rita doonv si sara ka umvuu doodu bvka riku mato. ²⁰ Ninyigv mvngjwng nam nga hv tupak mabv ridula, okv ninyi Pwknvyarnv gv milvppvnam aka mvngsarnam bv rimato; ninyigv mvngjwng ngv jwkrw gobv rilwk toku, okv Pwknvyarnvnyi umbonyikv vla hartv jitoku. ²¹ Hv ogunvgo milv pvpvdw um Pwknvyarnv rirungre mvngla hv mvngtin pvvtoku. ²² Vv ogulvkwngbv Abraham, mvngjwng lokv vbolo, “Pwknvyarnv darwknv gobv laarwk sipv kunv.” ²³ Gaam vdw lokv “Hv darwknv gobv

laarwk sinam” vkvglvga mvngchik ninyia lvmato. ²⁴ Hv bunu ngonu aka yvnyidw darwknv bv laarwk sirekudw, yvvdw Jisunyi ngonugv Ahtu sipikula turkur pvkunv mvngla ninyia mvngjwng dudw holvgabvka lvkllwk jidu, ²⁵ Ogulvgavbolo hv ngonu rimur lvgabv silwk jipvnnv, okv Pwknvyarnv gv lvkobv tarwkbak bv ngonua doomu dukubv hv turap pvkunv.

5

Pwknvyarnv lvkobv tarwkbaknam

¹ Vjak ngonu mvngjwng lokv Pwknvyarnv gvlo tarwkbak bv doodu kunv, ngonu gvlo *Ahtu Jisu Kristo gv lokv Pwknvyarnv lvkobv sarsopoyo bv doodunv. ² Ngonu vjakgv turdunam sum ngonu mvngjwng siku lokv Pwknvyarnv gv anyuaya nga hingkwkaakw dubv ninyi ngonua laalwk toku. Okv vkvlgabv ngonu googvdu[†] mvngtin sinam lokv ngonu gvlo Pwknvyarnv gv yunglit namv doodu kunv vla! ³ Ngonugv hirukaya aka ogumvngma bvku ngonu umka googv dunv, ‡ ogulvgavbolo ngonu chinduku hirukaya namsi saktv nvnga garlindu, ⁴ Saktvla rinam am laalwk namv Pwknvyarnv gv umbo mvngnamv, okv ninyigv umbo mvngla mvlinnamv mvngtin ngv. ⁵ So mingtin pvnamv mvnglak padubv ngonua rinam kaamare, Pwknvyarnv ninyigv paknama ngonugv lvgabv haapok lo pwlwk toku Darwknv Dow lokv, ngonua anyuamin bv amin jinamv.

4:25 Aij 53:4,5 * **5:1** Ngonu gvlo; Kitap kvvgo nvlo Kaju ngonu gvlo. † **5:2** Ngonu googvdu; Vmalo kaju ngonu goolaju. ‡ **5:3** Ngonuka goodu Vmalo Ngonuka klai goolaju.

⁶ Ngonu lvgabv vdwlo vjvlodv gobv mvdurridur jinv kaama bv rito, Pwknvyarnv gv gaknam alu lo alvmanv lvgabv Jisu kristo sijito. ⁷ Darwknv nyidam lvgabv siji dubv yvvka svkvnv sum rinyu mare. Vbvritola nyi akin go alvnnv nyidam lvgabv siji dubv busukano kaama lado. ⁸ Vbvritola Pwknvyarnv vdwgo ngonua pakdudw ninyi kaatam la ritoku—ngonu rimur nvbv rila doori lo ho Jisu kristo ngonugv lvgabv siji toku! ⁹ Ninyigv oyi lokv§ Ngonua Pwknvyarnv gvlo vjak tarwkbak bv doopadakpa modu kunv; vbvrikunamv, vdwgo kainam gobv si ridu, Pwknvyarnv gv haachiak lokv ninyigvbv ngonua ringreku! ¹⁰ Ngonu Pwknvyarnv gv nyimak bv rimisito, vbvritola ninyigv Kuunyilo gv sijinam lokv Hv ngonua ninyigv ajin gobvya mvtoku. Vjak ngonu Pwknvyarnv gv ajin gobv ridukunv, kristo gv turnam lo vd-wching go ngonua ringreku! ¹¹ Vbvritola vv mvnwng tikma, ngonua vjakgv Pwknvyarnv gvlo ajin bv mvlwknv, Ahtu Jisu kristo gv lokv Pwknvyarnv ogunvgo ripvdw vkvlgabv ngonuv him-pua padukunv.

Adam okv Kristo

¹² Nyi akin gv lokv nyiamooku so rimur vv aatoku, okv ninyigv rimur lokv sinama so laalwk toku. Vbvkaaka kunamv, sinamv nyi mvnwng joktung lo vngsik karduku ogulvgavbolo nyichar mvnwng ngv rimur riduku. ¹³ Pvbv nga jilwk madv bv nyiamooku ara svka rimur vv doolwk chotoku; vbvritola hoka ogolo Pvbv goka kaama

§ 5:9 Ninyigv oyi lokv; Vmajeka Ninyigv erin peejila sinam lokv.

5:12 Atk 3:6

pvdw, rimur am achingamu dubv sapnv nvnvgo kaamato. ¹⁴ Vbvritola adam gv alu lokv laala yikula Moses gv alu gobv, sinamv nyia nyipw mvnwng gv aolo rigv duku, rimur manv mvnwng aka Pwknvyarnv gv gamki am vdwlo adam rinam aingbv hv ka tvvbotvlik la oogv apia bv ridu.

Adam oogv nyi ako aapv kunv gv aringama aingbv ridunv. ¹⁵ Vbvritola anyiv akinma, ogulvgavbolo Pwknvyarnv gv anyuamin v adam gv rimur aingbv rima do. Si jvjv hvvrong ogulvgavbolo nyi akin gv rimur lvlo nyi achialvgo sitoku. Vbvritola Pwknvyarnv gv anyuaya ngv achialvgo kaiyabin yachoknv, okv vkvlgabv nyi akingo, Jisu kristo gv anyuaya lokv nyi Kvggonv ninyigv anyu amina paala ritoku. ¹⁶ Okv nyi akin gogv rimur vla okv Pwknvyarnv gv anyu aminv anyi baabwng ngv angusidu. Akonvgv rimur vv kokwnglo “rigakpanam” gv jwngkadaka kumamlo aaduku; vbvritola vdwgo rimur kokwnglo, amin paala dubv rima nvnga “rimur manv amina paatoku!” ¹⁷ Si jvjvrung ogulvgavbolo ho gv nyi akogv rimur v rigv laila sinamv nyi vdwgvlo rigvla riraptoku. Vbvritola Jisu kristo, vnam nyi akin lokv kaakunamv vdwnv kairungnv go ritoku! Mvnwng ngv yvvdw Pwknvyarnv gv dинchi rungngv anyuaya laarwk sidunv okv vv anyutaku bv ninyigv lvkobv singchasingyi lo Jisu kristo lokv tarwkbak bv rigvdakgv kolo doopadakpare.

¹⁸ Vkvlgabv, akin gv rimur lo mvnwng nga alvmabv rimu duku, oogv lamtv apia bv darwknv akin gv rinam lokv mvnwng nyi am anyutaku bv rimin jimu duku okv singnamrinam am bunua jiduku. ¹⁹ Okv nyi akin gv tvvbotvlik tvvku-

nam lokv kaaka kunamv mvnwng nga vbv jvbv rimur mokunam bv riduku, oogv apia bv nyi akin gonv gv tvvnambunam lokv kaaka kunamv Pwknvyarnv gv lvkobv tarwkbak bv bunu vdwv doopadakpa la riduku.

²⁰ Pvbv ngv rimur ridung am rigo yadubv mintamchodu; vbvritola ogolo rimur v, abuyasin dudw, Pwknvyarnv gv anyuaya vka om kaiyago bv ridunv. ²¹ Vkvlvgabv, sinamv rimur am laala yikula rigvla ridu, vkv apia bv Pwknvyarnv gv anyuaya ngv darwknv bv, ngonu Ahtu Jisu kristo lokv ngonua turbwng jinvinga rigv riku.

6

Rimur lokv sinamv vbvritola Kristo lvkobv ribam namv Turnamv

¹ Vbvrikubolo, ngonu oguvre? Pwknvyarnv gv anyuaya abuyasin bv kaiyadu bv ngonu rimur dvdvla risv gobvre? ² Vdwloka vbv rimare! ngonu rimur lo sitoku—ngonu rimur lo oguaingbv singlarila reku? ³ Nonuv jvjklvbv chindo vd-wlo ngonu Jisu kristo lo baptisma laaku bvdw, ngonugv baptisma laaku namv ninyigv lvkobv siming gvpv kunv. ⁴ Ngonugv baptisma laaku namsi, vbvrikunamv, ngonuka ninyigv lvkobv svma rilaku okv sinam am orpinoryin sudukunv, vbvching, Jisu kristo Abu gv kainv jwkrw lokv sipikula turkur kunam aingbv, ngonuka anwnv akobv turkur lakula singlarila reku.

⁵ Ngonu ninyigv lvkin gobv vkvgv vbv sinam aingching bv siming gvla ribolo, hogv apiabv

ngonuka ninyigv lvkin gobv vkvgv turkur kunam aingching bv turkur minggv riku. ⁶ Okv ngonuv sum chindu kunv ngonugv kvvlo ridungsingdung ngv Jisu kristo gv lvkin gobv dapolo sila sipak gvmu pvkunv, vbvrikunam si rimur rinam gv jwkrwv ho mvkmvrwk ropvkunv, vkvlgabv ngonu rimur gv pakbu bv ritinriyin la rikumare. ⁷ Vdwlo ngonu sirikudw, ngonu rimur gv jwkrw lokv ajarabi bv rimin duku. ⁸ Ngonu kristo gv lvkobv siming gvri kulo gvngv, ngonu vbv mvngjwng dukunv ninyigv lvkin gobv ngonuka turkur minggv riku. ⁹ Ngonu vbv chinduku kristo sipikula turkur pvkunv okv vdwloka lvkodv siku mareku—sinamyamv vdwloka ninyi aolo rigvdogv nyola kumare. ¹⁰ Okv vbv, ogulvgabv hv sijipvnnv vbolo, rimur gv jwkrwv ninyigv aolo riku madu kubv; okv vjak hv ninyigv singtungritung nga Pwknvyarnv gv lvkobv ajin bv ribamdakbam reku. ¹¹ Oogv apiabv nonuka vbv atunvngv siya gvpv kunv mvngsu tvka, vbv rimur am adukoyo gvdu kunv, vbvritola Jisu kristo lokv Pwknvyarnv gvlo lvkobv ajin doobamdakbam paala ridudodu kunv.

¹² Rimur am noogv aw aralo vdwloka rigv mooku yoka, vkvlgavbolo noogv klu mvngdung nga nonuno mvngdubv ribvdvvre. ¹³ Nonuno atubongv alvmanv mvngdungridung lo baagonyi rimur lo tulwk mamsv yanga. Vbvmayabv, Pwknvyarnv gvloya atubonga jiya sitoka, sinam lokv turnam lo laalwk kunv, okv ogumvnwng nga tulwksula ninyigv Darwknv ridungsingdung lo ritokuka. ¹⁴ Rimur am noogv atu bv rirung moma bvka; vkvlgavbolo nonuno Pvbv gv arwng lokv

singma donv vbvritola Pwknvyarnv gv anyuaya arwng lo doodunv.

Darwknam gv nyira

¹⁵ Vbvrikubolo, ogubv rire? Ngonuv rimur dubvre, ogulvgavbolo ngonu Pvbv gv aralo dooma vbvritola Pwknvyarnv gv anyuaya ara lo doodunv? Ma vbvma! ¹⁶ No jvjvklvbv chirungdunv vdwlō nonuno atubongv akogv pakbu gobv ribolo, nonuno atu gv mingku am tvvnvgobv riduku—rimur gv nyira gobv ribolo, kakabolo vv sikuyaku bv rire, vmalo rijwk namgv nyira bv ribolo kakabolo Pwknvyarnv gv lvkobv tarwk-bak bv doopare. ¹⁷ Vbvritola Pwknvyarnvnyi umbonyikv Vtoka! Ogulvgavbolo Alu gulo no rimur gv nyira bv rito, nonuno atubogv haapok lokv tamsar nvnga tvla jvjvklvbv kaatv kunamv laarwk sitoku. ¹⁸ Nonuno rimur lokv linla kula okv darwknvgv pakbu bv rimin dukunv. ¹⁹ (Ngo aludwkibv mimbv nam gaam am minjire nonua tvvpi nyodubv ho mabolo nonuv tvvpi lamare.) Alu gulo nonuno atunvngv ogumvnnwng am tulwksula nyira gobv rimur lo rito okv alvmanv lvgabv alvmabv mvngnam lo ridu. Oogv apia bv nonuno vjak atunvngv tulwk sirung lakula darwknvgv pakbu gobv rila Darwknv mvngdun-gridung bv ritoka.

²⁰ Vdwlō nonuno rimur gv nyira bv singri lo, nonuno Darwknvgv nyira bv doomato. ²¹ Kaatoka nonuno oogv rinampanam lo ogunvgo paaduku vjak nonuno hinyingsung pakdukunv ai? Oogv rinampaanamv anyung lo sinam bv riduku. ²² Vbvritola vjak nonuno rimur lokv linro

pvkunv okv Pwknvyarnv gv nyira bv ripv kunv. Vjak noogv laap paanamv turnam bv ridu um ninyia tumijiki jitoka, okv anyungnyi kaakubolo turbvdakbv kunambv ridukunv. ²³ Rimur lvgabv rijo panamv—sinam bv ridu; vbvritola ngonu Ahtu Jisu kristo lo akin gobv rinamv Pwknvyarnv gv anyutaku amin jinam turbvdakbv mooku nvbv ridu.

7

Nyimv laamisinam lokv miringnam ako

¹ Ngoogv ajin vdw, nonu chindure ngo ogunv lvkwnglo mintv dunvdw, ogulvgavbolo nonu mvnwng ngv Pvbv lvkwnglo chindo. Pvbv ngv nyiv vdwgo turbvdakbv ridw vkvgo aolo rigvre. ² Nyilu dukunv nyimv nvgonyi, miring nvdu, vdwgo hv turbvdakbv ridw vkvgo ninyi nyilu gv Pvbv aralo dooladakla ridu; vbvritola hv siro kubolo, ninyia vkvgv Pvbv lokv hv nyimv mvjar bv rimirin la riduku. ³ Okv vbvrikunamv ninyigv nyilu nga turmudakmu tvla kvvbi nyi go doobamkarbam bolo, um yomurnv akobv mireku; vbvritola vkvgv nyiluv siku bolo, nyimv mvjar bv rila dukunv okv hv kvvbi nyigo laamisiku jvka um yomur nvgobv mila kuma dukunv. ⁴ Ngokv ajin vdw, si nonu gvloka vbvridu, Pvbv gv ridungbv riming gvnbolo, nonuno ka siri kunvppv, ogulvgavbolo nonuno kristo gv adwn dingo bv ridu; okv nonuno vjak sinam lokv turkur kunv ninyigvnbv ridukunv, vbvrinam lokv Pwknvyarnv gv kudungkua nga ngonua alv rungnv gobv rimu dukubv vla. ⁵ Holvgabv vdwlo ngonu adwnayak

gv ridungsingdung bv riridw, Pvbv lokv rimurvngmur mvngnam vv ngonugv adwnayak lo rilwkdolwk do, okv ngonugv rinyung ngv sinam lo nyeduku. ⁶ Vjak, ogubvrijvka, ngonu Pvbv lokv ajarabi lindukunv, ogulvgavbolo ngonua lvko patwk lo tumtoku oogv rimur lvkwngbv ngonu sipv kunv. Lvkodv ngonu kvvlo gv lvkpv kunam Pvbv lamtv lo ngonu riku madu, vbvritola Dow gv anwnv lamtv lo riduku.

Pvbv okv rimur

⁷ Vbvrubolo, Pvbv si rimur vre, vla ngonu minla dunvre? Vbvma! Vbvritola Pvbv si doola rimure ogudw um ngonua chimu pvnv. Pvbv ngv, “kvvbi gv rinam doonamv ogudw um mvngkakapak yama bvka vmabolo,” vkvnv um ngo chima pvn-vpv. ⁸ Vbvritola oogv rimur Pvbv ngv katakching paknamgo paadula ngo gvlo nvgwng mvnwng gv atubogv lvgabv mvngsu gnv bv rimudu. Pvbv gv agumlo, rimur vv sinambv ridunv. ⁹ Ngo kvvlo rimur lokv linto kula singtorito kunvi vbvrinamv vdwlo Pvbv ngv aakubvdw, rimur v turnam lo vngsik kartoku, ¹⁰ okv ngo sitoku. Okv Pvbv ngv turnam lo laalwkubv vla rinamv ngo lvgabv sinam am laalwk jito. ¹¹ Rimur ngv oogv katakching pakbv mapa toku okv oogv Gamki lokv vv nga kupduku okv mvki laka ritoku.

¹² Vbvrikunamv, Pvbv ngv awv darwk, okv gamki pvnamv darwknv, tarwkbak, okv alv nvbv ridu. ¹³ Vbvkubolo soogv alvnnv ogu rikudw ngoogv sinam lvgabv laalwk jinv vri? Vkvnv lokvma! oogv sum rimunv vv rimur gv ridung

ngv; alvnnv si ogudw rinam lokv, rimur vv ogugudw um kaatam nam lvgabv sinama ngo gvlo laalwk jitoku, oogv jvjvrungnv turnam aingbv vbvching rimur aka kaatam lakdu. Okv vbv, gamki lokv rimur am si kaiyasin bv adwkakunamv rimur am kaatam jiduku.

Ngonugv aralo pamilami sinam

¹⁴ Ngonu chindu Pvbv si darwknv singdunglo dungnv ngv; vbvritola ngo biimatama nvgo, rimur lo nyira bv pyoklwk kunamv. ¹⁵ Ngo ogu ridunvdw um ngo chimadu; Ngo ogugunyi risv vdw um ngo rimadu, vbvritola vbvmayabv ngo ogugunyi kaanwng madudw um ngo riyingchok padu. ¹⁶ Ngoogv ogugo ridunv si ngoogv rinwng manam am ngo ridu, um kaarinyi Pvbv sumka alvbv ngo mvngdu. ¹⁷ Vkvlgabv jvjvbv vkvnvlo rinvdonv ngv ngo madu; Vbvrinmayabv, oogv rimur vv ngo gvlo rilwkdolwk la rimudakmu gvdunv. ¹⁸ Ngo chindu alvnam si ngo gvlo doomadakma dunv—vkvnnv si, ngoogv adwnayak lo ridungdodung bv ridu. Holvgabv ngo gvlo alv nvnv ridubv doola kujeka, ngo um rila gvku madu. ¹⁹ Ngo alvnam ridubv mvngnam am ngo rimadu; vbvmayabv, ngo alvmanv rinwng manam am ngo riyadu. ²⁰ Ngo rinwng manam am ngo ridubolo, oogv ridunv angv vv manv ngo ridubv rimadunv; vbvmayabv, um ridunv vv mvngnam ara sokv doonv rimur vv ngam rimu doonv.

²¹ Vkvlgabv soogv Pvbv si vbv kudungkua ridungdo; vdwlo ngo alvnam si ogudw ngo rinvpv mvngla ridudw, alvmanv si ogudw um

mvngchikya ngo gakdu. ²² Ngoogv hang arwng jelodv Pwknvyarnv gv Pvbv nga achialvbv alv mvngdu. ²³ Vbvritola ngoogv awlo kvvbi Pvbv yago ridubv kaadu—Pvbv akonv Pvbv akonyi nyiru minsu dubv kaadu um ngoogv hapokang ngv mvnglwkw minggvdu. Ngoogv adwnayak arwng so kudungkua ridunv rimur gv Pvbv si ngam pachipatk doomu nvgobv mvdu. ²⁴ Ngo oguguka mvngpu kumanv nyi go! yvvkula nga so simu jikunv ayak sokv ngam ringlin kuji nvngv? ²⁵ Pwknvyarnvnyi umbonyikv vtoka, ngonu Ahtu Jisu kristo gv lokv rimu dunv!

Vbvrikunamv, si, ngo vbvriduku; ngoogv mongrumara lokv ngo Pwknvyarnv gv kudungkua nga riladu mvngdu, vbvrijvka ngoogv nyia ridungsingdung ngv rimur gv Pvbv lo kudungkua nga rijidu.

8

Dow lo turnamv

¹ Yvvbunudw Jisu kristo gvlo doodu kudw, vjak um yvvka miyakaya kumare. ² Holvgabv Dow gv Pvbv ngv, ngonua Jisu kristo gvlo laalwk laku, rimur okv sinam gv Pvbv lokv ngonua* limu toku. ³ Kvlvgavbolo nyia ridungsingdung ngv lvvku mabv rinam lvga lo, Pvbv ngv ogu rila kumato, um Pwknvyarnv ritoku. Hv ninyigv atubogv Kuunyilo nga jilunam lokv nyia arwnglo rimur am miyakaya toku, ngonugv nyia ridungsingdung aingbv aala ridungsingdung minggvla, rimur am

* **8:2** Nga; Kvgonv kitaplo Nonua; Kvvbi lo Ngonua.

laala laa jidubv vla. ⁴ Pwknvyarnv vbv so rikunam si yvvdw Dow lo dookunv vdwv ngonu aralo darwkchongjor bv Pvbv nga mvngkulo ripwnggrinya dukubv vla ridu, okv nyia ridungsingdung lokv ma. ⁵ Yvvdw bunugv nyia ridungsingdung lo doodudw bunua mindu, mongrumara lo ogunvgo nyia mvngnam nyia ridungsingdung lokv rigv kotoka. Yvvdw Dow gv mingku lo doodudakdudw bunua mindu, mongrumara lo Dowv ogugo mvngdudw vbv rigv kotoka. ⁶ Nyia ridungsingdung lokv rigv kobolo anyung ngv sinam bv riduku; Dow lokv rigv kobolo anyung ngv turnam okv sarsopoyo bv riduku. ⁷ Okv vkvlvgabv nyiv vdwlo bunu nyia ridungsingdung lokv rigv koku bolo kokwng loku Pwknvyarnvnyi nyiru minsu nambv ridu; holvgabv bunu vdwv Pwknvyarnv gv Pvbv lo tvvmadu, okv vbvmaka bunu vdwv sum tvvlaka nyola madunv. ⁸ Yvvdw bunugv nyia ridungsingdung gv mingkulo tvvdudw vv Pwknvyarnvnyi ayum kodubv rila nyoma dunv.

⁹ Vbvrítola nonuno nyia ridungsingdunglo doomadakma dunv vla nonua mindu; vbvmayabv, Dow mingkulo doodudakdunv—vbvribolo, Pwknvyarnv gv Dowv nonu gvlo doodudakdu. Yvvdw Jisu kristo gv Dow lo doomadakma dunv vv ninyi gvbv rima dunv. ¹⁰ Vbvrítola kristo nonu gvlo doodu bolo, Dow si nonugv turnam lvgabv† ogulvgavbolo nonuno Pwknvyarnv gvlo tarwkbak dunv, vbvrijvka nonugv awlo rimurv dooming gvkulo sitv tvvduku. ¹¹ Pwknvyarnv gv Dowv, Jisunyi

† **8:10** Dow si nonugv turnam lvgabv; Vmalo nonugv dowv turdu.

8:11 1Kor 3:16

oogv sinam lokv turmu kunv, vv nonu gvlo doobodakbolo, vbvrikubolo Hv kristonyi sinam lokv turmu kunv ninyigv Dowv nonugv aw aralo doonam lokv nonugv bikutapku manv aw umka turmu jireku.

¹² Vkvlgabv, ngokv ajin vdw, ngonu gvlo risvgo doorungdo, vbvritola si ngonu nyia ridungsingdung gv mvngnam lokv ridudakdu bv rima.

¹³ Holvgabv nonugv rinamdaknam lo nyi nyia ridung lokv ridubolo, nonuno sitv tvvdu kulaka; vbvritola Dow lokv nonugv rimur kunam gwngnamrinam am simu kubolo, nonu turtv rikunv.

¹⁴ Yvvdw Pwknvyarnv gv Dow lokv rigv dudw vv Pwknvyarnv gv umvuu ngv.

¹⁵ Holvgabv oogv Pwknvyarnv gv Dow jinamv nam nyira bv mvmare okv busu nvgo bvka rimu mare; vbvmayabv, Dowv nam Pwknvyarnv gv umvuu bv mvreku, okv Dow jwkrw lokv ngonu Pwknvyarnv gvlo kapka mingka paariku, “Abu! ngokv Abu!”

¹⁶ Pwknvyarnv gv Dowv ninyi atubongv ngonugv dow am akin gobv ridula vbv mindu ngonu Pwknvyarnnv gv umvuu vkv vla mindw rkwkng jidu.

¹⁷ Ngonu klu lokv ninyigv umvuu ngv, vkvgv nyi vdwgv lvgabv vvpv jinam bokta nga ngonu paare, okv ngonu kristo gv lvkobv Pwknvyarnv gv ninyigv lvgabv ogugo vvpv jipvdw umka paaming gvvre; holvgabv vdwgo kristo gv hirukaya nga ngonu paaming gvredw, ngonuka ninyigv aingbv turnam loung am paaming gvvre.

Aainvlo yunglit svngv

18 Ngo mvngdu vjvgv ngonugv hirukaya hindunv sum ungam mvnwng nga ngonua kaatam tvvdunv so minchi sidubv rimadu. 19 Pwknvyarnv gv Pwknamyarnam dvdv ngv mvnggapla ninyigv umvuu vdwa gugur alv bv kaatam garnam lvgabv kaayadoya la riduku. 20 Holvgabv Pwknamyarnam dvdv nga atu atugv anyung anyanga nyemu dukubv miyakayato, vv awgv mvngnam lokvma, vbvritola ogulvgavbolo Pwknvyarnv vbvrimu dubv jinv, vbvrijvka oogv mvngtin sinamgo doodu 21 oogv Pwknamyarnam dvdv ngv awv alu gulo nyira lo nyelwk kunv lokv lindu kula okv Pwknvyarnv gv umvuu vdwgv lvkobv nyarminsomin laku mvngsv kaama bvku hartvbamtv minggv kunam paariku. 22 Holvgabv ngonu chindu vjakgv ridudakdu so pwknamyarnam dvdv ngv, umvuu bvngtv nvgv ochinam aingbv sigin ginbvla ridu. 23 Vbvritola sigin gindunam si pwknamyarnam dvdv vv mvngchikma; ngonu gvlo yvvdw Pwknvyarnv gv amin jichonam gobv Dowv doonv vv sigin ginlaku ngonugv atubogv aralo Pwknvyarnv gv lvgabv dooya nvgobv rila ninyigv umvuu gobv mvdubv okv‡ ngonugv nyi dvdv nga ogu mvngsv kamabv rimudubv. 24 Holvgabv oogv vv ngonugv mvngtin kunam lokv ringlin toku; vbvritola ngonu mvngtin nam lvgabv ngonu ogugo kaadubv rima nvgo bolo, ngonu vkvgo jvjvbw mvngtin dubv rima pvnvpv. Holvgabv ngonu mvngtin nam lvgabv yv vkudw ogoogu

8:20 Atk 3:17-19 **8:23** 2Kor 5:2-4 ‡ **8:23** Kvgonv kitap lo doomadu Ninyigv umvuu bv mvdubv vla okv.

lo kaadunv? ²⁵ Vbvritola ngonu ogugo kaapa madudw um mvngtin nambv ribolo, ngonu saktvla toya nambv ridu.

²⁶ Oogv apiabv Dow vka, ngonugv lvvkumari kunyi ridur tvvbv ngonu gvlo aadu. Holvgabv ngonu oguaingbv kumsv vdw ngonu chimadu; ngonugv oogv gamchar bv kubvk jvmabv sigin gingvla kumchin manam am Pwknvyarnv gvlo dinchi bv Dowv ninyi awv ngonu lvgabv kumjidu.

²⁷ Okv Pwknvyarnv ngv, ngonugv haapok am kaadunv, Dowv ogugo mvngdudw um chindu; ogulvgavbolo Dowv Pwknvyarnv gvlo ninyigv nyi vdwgvbv dinchi jila ridu okv ninyigv mvnglwkw lo rijidu.

²⁸ Ngonu chindu yvvdw ninyia pakdudw oogv aralo oguogu mvnwng ngv alvnam lvgabv rijidu, § yvvnyi hv gokdudw vv vkvgv mvngnam lokv ngv.

²⁹ Yvvnyi Pwknvyarnv gaklin ropvkudw hv ka ninyigv umvuu acho aingbv rimu riku, vkvlv-gavbolo mvngjwngnv mvnwng lokv oogv umvuu angv vv abwng yachokbv riyiku. ³⁰ Okv vbv yvvnyi Pwknvyarnv gv umvuu bv darlin pvkudw, um hv gokrw lintoku; okv Hv ninyigv lvkobv tarwkbak moduku, okv Hv ninyigv hartvbamtv nama bunua lvkobv orpinorin sila ritoku.

Jisu gvlo Pwknvyarnv gv paknam

³¹ Vbv soogv mvngnam si vvkubolo, ngonu ogugo minla nyolareku? Pwknvyarnv ngonu

§ 8:28 Yvvdw ninyia pakdudw oogv aralo ikimora mvnwng ngv alvnam lvgabv bv rijidu; Kvgonv kitap lo vbv doodu Yvvdw Pwknvyarnvnyi pakdudw ogumvnwng ngv alvnam lvgabv ridu.

gvbv ribolo, yvka ngonua oguguka rila mare?

³² Pwknvyarnv vbvmato, ninyigv atubogv Kuunyilo mvngchik am imu tvnv nga laakur kumabv imu jitoku, vbvritola ninyi ngonu mvnwng lvgabv jito! Hv ngonua ninyigv kuunyilo nga jinv ngv—hv ngonua ogumvnwng ngaka anyubv jima ridw? ³³ Yvvdw Pwknvyarnv gv gaklin kumam nyi am gungnying lwklare? Pwknvyarnv atubongv bunua rimur kaama nvbv minchar jidu!

³⁴ Vbvribolo, yvva bunua miyakaya jinv ngv? Siji kunv Kristo Jisu, hogv sipikula turkur kunv okv vjakgv Pwknvyarnv gv lakkik peelvlo dooto kula, ngonu lvgabv Pwknvyarnv gvlo kumdung jidu! ³⁵ Vbolo, yvkkula, Kristo gv paknam lokv ngonua mvpin sila kuji nvngv? Adwkaku vri, vmalo nyingtarmvtar sinam vri, mvdwkmvku yajinv ngvri, vmalo dvmakano vri, nyimaheema vri vmalo maanyingmaatar vri vmalo sinamyanam vri? ³⁶ Darwknv kitap v vbv mindu,

“Noogv lvgabv ngonu dvbvdwkibv maatar albv sitvngotv yadu;

Ngonua svlar am mvki tvvnam aingbv richarinyardu”

³⁷ Ma, ninyigv ngonua paknam lokv soogv ogumvnwng sum ngonuv rigum yadukunv!

³⁸ Holvgabv ngo alvjvbv minji dunv sokvgv ogu gunvka ninyigv paknam lokv ngonua mvpin sila nyomare: Sinam vmalo turnam vre, nyidogindung vre vmalo kvvbi nyidomooku am rigvdogvnnv gore, vjak gvgore vmalo aainvgv gvgore, ³⁹ vmalo ao nyiamooku lokvri vmalo lvkwng nyiamooku lokvri—Pwknamyarnam gv

dvdv ngv ogunv gunvka ngonugv Ahtu kristo Jisu gv lokv ngonugv Pwknvyarnv gv paknama ngonua mvpin sila nyomare.

9

Pwknvyarnv okv ninyigv nyi vdwv

¹ Ngo jvjvbw mindung dunv; ngo kristo gvngv okv ngo mvvma dunv. Ngo mvngnam sum, Darwknv Dow lokv rigv namv, vbvka ngo jvjv rungdu vla mintamjidu ² vdwlo ngo mindu ngoogv mvn-gruv vdwgo kaidu, vdwgo ngoogv achiv haapok lokv nyeka madu vdu ³ holvgabv ngoogv nyiv, ngoogv awgv adwnv okv oyiv! Holvgabv ngo atuv bunu lvgabv Pwknvyarnnv gv beenam lo okv Kristo gv lokv apin sito kunvpv vla mvngdu. ⁴ Bunu vdwv Pwknvyarnv gv nyi ngv; Hv bunua ninyigv umvuu bv mvtoku okv turnam loung am bunu gvlo kaatam jito; Hv ninyigv umkv-pakvnam* am bunugv lvkobv mvtoku okv Pvbv nga bunua jitoku; Bunu vdwv jvjvrungbv kumnya jiduku; bunu vdwv Pwknvyarnv gv milvpvnam laarwk sinyatoku; ⁵ Bunu vdwv Hebrew abuapa yunam lokv ali linvgo; okv kristo, nyia nyidung akobv bunugv lokv lindu. Pwknvyarnv ngv, mvnwng nga rigvdogvnnv, hartv tvbv la riyilaka vdunv! †Amen.

⁶ Ngo Pwknvyarnv gv milvpvnam v dooku makv vla mima dunv; holvgabv Israel gv nyi mvnwng ngv Pwknvyarnv gv nyi mvngchikbv

9:4 Mog 4:22 * **9:4** Milvnam vdwv; Kvgonv manuscripts lo milvnam. † **9:5** Pwknvyarnv ngv, mvnwng nga rigvdoogvnnv, hartv tvbv la riyilaka vdunv!

rimadunv. ⁷ Vmajvka Abraham gv singsit lokv linv mvnwng vka Pwknvyarnv gv umvuu bv rimwng madunv. Pwknvyarnv Abrahamnyi mintoku, “Ngo nam milvpvvdv kunv Isaak gv lokv noogv husiv twngtv bv doosiksilin reku.” ⁸ Soogv vbv minam umvuu bvngnam dvdv ngv bvngdinnv ‡ Pwknvyarnv gv umvuu bv Pwknvyarnv gv umvuu bv ridunv vnam kaama; vbmavabv, Pwknvyarnv gv milvpvvnv lokv umvuu bvngnam dvdvlo jvjv bv singsit doosiksinam am mindu. ⁹ Holvgabv Pwknvyarnv gv milvpvvnv oogv vkvnv gamchargo mimpv jito; “oogv aluching lo§ ngo aakur rekunyi, okv sara umvuu go dooreku vto.”

¹⁰ Okv si tikma, holvgavbolo Rebika gv kuunyilo anyi vka abu akinnv, Isaak ngonugv abuapa ngv. ¹¹⁻¹² Vbvritola oogv vbv minam lokv akonv vv Pwknvyarnv gv atubogv mvngnam lokv gaklin kunamv, Pwknvyarnv ninyia minto, “bvngcho yanam angv vv boru yanga rijivngji yanv govv rire.” Pwknvyarnv bunua bvngtv madv bv sum mincho jitoku, bunu oguguka alvvnvnga alvmanv nga rima dubv; vkvlgabv Pwknvyarnv gv so gaknamv ninyigv goknam lokv rito, okv bunugv oguguka rinamdoonam lokvma. ¹³ Darwknv kitap v vbv minto, “ngo Jakopnyi pakdunv, vbvritola Isaunyi pakma dunv.”

¹⁴ Vbvrikubolo ngonu minladunv, vv Pwknvyarnv jwngkadaka madu nvgoi? Ma vbdvdv

9:7 Atk 21:12 ‡ **9:8** Soogv vbv minam umvuu bvngnam dvdv ngv bvngdwn v **9:9** Atk 18:10 § **9:9** Oogv alu chinglo **9:11-12** Atk 25:23 **9:13** Mal 1:2,3

ma. ¹⁵ Vkvlgabv hv Mosesnyi minto, “ngo yvnyi mvngdudw um ngo aya dunv; ngo yvnyi mvngdudw um ngo pakdunv.” ¹⁶ Vkvlgabv vbvrikubolo, ogumvwnwng mvnging nama, ngonu nyia mvngdung okv ridung lokv ogudw um rimadu, vbvritola Pwknvyarnv gv aya mvngchik lokv ridunv. ¹⁷ Holvgabv Darwknv kitap v Ejipt gv dvbv nga mindu, “ngo nam ngoogv jwkrwa kaatamla rinvvngnv dubv dvbv gobv mvpvnv okv ngoogv kai am nyiamooku mvnwng lo chinsik karmu dubv vla.” ¹⁸ Holvgabv vbvrikubolo, Pwknvyarnv gv ninyigv aya nga yvnyi mvngka dudw um jiso mvngnam am hv jidu okv hv ninyigv mvnggwnglo yvnyika akortor dubv mvso mvngbolo mvladu.

Pwknvyarnv gv haachi okv ayanam

¹⁹ Vbvritola nonuno akin gonv ngam vbv minre, “si vbvridubolo, oguaingbv Pwknvyarnv nyigonv gv rimur am mapa ridw? Yvvdw Pwknvyarnv gv mvnglwkw ka mvtor nyola redw?” ²⁰ Vbvritola ngoogv ajin vdw, nonu yvvla, Pwknvyarnvnyi mingkurla mirwk sila jinv ngv? Pvchwing ngv mvnv atu am “no nga ogubv svbv mvpvnvri vla tvka sudunvri?” ²¹ Ogubvrijvka, yvvdw Pvching mvnv ngv vv atugv mvnggwng bv ogubv mvnvrinv nwingdudw vbvching mvnvrinvre, okv takam kvdw nuunum akin lokv pvchwing anyi mvnam um, akonyi apum pamrinyi okv akonyi kvvbi adung lo mvnvrinv mindu. ²² Okv Pwknvyarnv gv ogugo ripvdw vv jvjvbw vsukaring sibv

rito. Hv ninyigv haachi nama kaatam nwngtoku. Okv ninyigv jwkrwa chimu toku. Vbvrítola hv achialvbv saktvto yvvdw ninyigv haachi nama hiru rugvdudw, oogv sitvyaatv lakula sigvn-googv tvvdu kunv ngv. ²³ Okv hv ninyigv ny-itv kairungnv hartvbamtv aka achialvbv kaatam vngroku, oogv ninyigv aya nga paamu dubv vla ngonugv aolo pwlwk kunam vkvnvgo, yvvdw ngonu vdwgvlo hv ninyigv yunglit nama laarwk sidubv mvpvripv dukunv. ²⁴ Holvgabv ngonuka goknam nyi bv ridukunv, Jius vdwgv pingko lokv gokmwng mvngchik ma vbvrítola Jentail vdwgv pingko loka gokdu. ²⁵ So si ogubv hv mindudw Hosea kitap lo doodu.

“Yvvdw ngoogv nyi bv rima dunv
‘ngoogv nyi’ bv gokreku.

Ngoogv pakma nam diringmooku vdwa,
‘ngo pakya yarungnam gobv gokreku.’

²⁶ Okv achialv bv mooku lo ogolo bunu mimpv
kudw, ‘nonu ngoogv nyi makv vla.’

Hoka bunu vdvw turnv Pwknvyarnv gv
umvuu ngv vla mireku.”

²⁷ Okv Aijaya ka Israel vdwgv lvkwnglo gokpa
jito: “Israel gv nyi vdvw svmasa gv chokri gv
aingbv rijeka, vbvrikwng kujvka miang chaigo
ringlin komwng rinvpv; ²⁸ Um lvgabv Ahtu nyi-
amookua ninyigv sabsvbusv ngam baapu alvbv
kaadartabia reku.” ²⁹ Sum Aijaya gvlo kvvlo
vbvching minto, “Ahtu kainv, singsitnv kvvgonyi
ngonua apak jimabolo, ngonu sodom aingbv
ripvkunvpv, ngonu Gomora aingbv ripvkunvpv.”

Israel okv Gamlv

³⁰ Vkvlgabv ngonu Jentail vdwgv lvkwnglo mindu, oogv yvvdw bunu atubongv Pwknvyarnv gvlo tarwkbak bv doodubv gwngma dudw, ninyigvlo tarwkbak bv mvngjwng lokv doomudakmudu; ³¹ Pwknvyarnv gv nyi ridula, oogv Pvbv ngam mala tarwkbak bv bunugv Pwknvyarnv gvlo doodubv vla rinv vdvw, vv paamatuku. ³² Okv vv ogulvgabv paamadunv? Vkvlgavbolo bunu mvngjwng nama mvnging mabv rito vbvritola bunu ogugo ridudw um mvnging mvngto. Okv vkvlgabv bunu “vlwng dwktup” kolo dwktupla rito. ³³ Oogv Darwknv gv kitap lo minto:

“Kaatoka, ngo Jayon lo vlwng pvgo vvpvdunv
vv nyi vdwa dwktup more,
vlwng pvngv vv bunua gimup more.

Vbvritola yvvdw ninyia mvngjwng dunv um
sanga momare.”

10

¹ Ngokv ajin vdvw, vdwgo ngoogv haapok mvn-
wng lokv ngo mvngdu ngoogv nyi vdwa turnama
paamudubv! Vdwgo ngo bunu lvgabv Pwkn-
vyarnvnyi ngo kumdunv. ² Ngo minchar jila
dunv bunu Pwknvyarnv gvlo tulwk silare; vb-
vritola bunugv tulwk sinamv jvjvlo chinchipachi
dula remadakma dunv. ³ Bunu vdvw Pwkn-
vyarnv ninyi gvlo nyi am tarwkbak gvnnv lamtv
nga kaatam dunv vla chimadu, okv vbvmayabv,
bunu atubogv mvngdungridung lamtv lo risu-
dosu dubv gwnglwkw dwdv duku; okv vkvlgabv

bunu Pwknvyarnv gv nyi vdwa tarwkbak bv ridubv lamtv kaatam namlo bunu awv tulwksima duku. ⁴ Holvgabv kristo Pvbv nga laangam nyami toku, vkvlgavbolo mvngjwng la doobu vdvw Pwknvyarnv gvlo tarwkbak bv doonamdaknam am paareku.

Ringnambaanamv mvnwng gv lvgabv

⁵ Pwknvyarnv gvlo tarwkbak bv doonamdaknam lkwng bv Pvbv lokv paadunv vla Moses vbv lvklwkto: “Yvvdw Pvbv gv gamki jinam am tvvdudw vv singnama paare.” ⁶ Vbvritola Darwknv kitap vv mvngjwng lokv Pwknvyarnv gvlo tarwkbak bv doonvdaknv lkwng bv si mindu: “No awv tvvka suma bvka, yvvkudw Nyidomooku bv chaare kudw?” (Oogv so, kristonyi lkwng loka laalu dukubv). ⁷ “Vmabvya sum nonu tvvka mabvka, sichingmooku arwnglo iji kunv yvvkudw?” (Oogv so, kristonyi sinam lokv laacha dukubv). ⁸ Soka vbv minto. “Pwknvyarnv gv doin nonugv nvchilo doodu, nonugv nabchunabar lo okv nonugv haapok arwnglo doodu”—oogv vv, mvngjwng namgv doinv um ngonu minggo karpv kunv. ⁹ Nonu gaam lokv mingkuk jila ho Jisu kristo ngonugv Ahtuv vla okv mvngjwng la ho Pwknvyarnv ninyia sinam lokv turkur moopv kunv vla mvngdu bolo, nonua ringlin kunv gobv rireku. ¹⁰ Holvgabv si ngonugv mvngjwng nam lokv Pwknvyarnv gvlo ngonu tarwkbak bv doodunv, ngonugv mingkukrikuk nam lokv ngonu ringnam am paadukunv. ¹¹ Darwknv kitap vbv mindu, “yvvdw ninyia mvngjwng dudw vv sanga

nam kaamare.” ¹² So minam si mvnwng gv lvgabv mindu, vkvlgavbolo hoka Jius okv Jentail gv pingkolo akusinv yago kaama; Pwknvyarnv mvnwng gv Ahtu akinnv okv yvvdw ninyia gokdudw mvnwng nga nyitv rungduv boktalwkjidu. ¹³ Darwknv kitap vbv mindu, “Yvvdw mvdur nam lvgabv Ahtunyi gokdudw vv ringlin kunam gov rireku.”

¹⁴ Vbvritola ninyia mvngjwng matola mvdoridor nam lvgabv bunu oguaingbv gokla nyoredw? Okv bunu doin tvvpa mabolo oguaingbv bunu mvngjwng nyolaredw? Okv bunu doina japgo karma bolo oguaingbv bunu tvvpa nyolaredw? ¹⁵ Doin japjinv agumailo vnglin mabolo oguaingbv bunu doin japla nyolaredw? Darwknv kitap vbv mindu, “yvvdw tvvpunv gamlv nga aagv dunv doin minji jinv vdvw aadung dunv si vdwo gaasartabo bv kaapu rungdu!” ¹⁶ Vbvritola mvnwng ngv tvvpunv gamlv nga laarwk simadu. Aijaya atubongv minto, “Ahtu, yvvla ngonugv doin mintam nama mvngjwng jinv ngv?” ¹⁷ Vbvrikunamv, mvngjwng ngv doin am tvvku lokv aadunv, okv doinv Jisu kristo gv lvkwn-glo doin japgo jinamv.

¹⁸ Vbvritola ngo tvvkadunv: Si jvjv ngvkudw bunu doin am tvvpa marung jvpv kundw? Vv kvvtvlo bunu tvvpv nvkvvtvlo—holvgabv Darwknv kitap vbv mindu:

“Bunugv vdudunam gv vlv ngv nyiamooku mvnwng gv agumailo vngsik karduku;

bunugv gamchar vv mooku mvnwng gv chingtardotar lo tvvpok nyaduku.”

19 Lvkodv ngo tvvkato: Israel gv nyi vdww jvjvbw tvvchin marungto ai? Mintuminke bv mirwk chonv ngv moosesnv:

“Ngo kvvbi diringmooku nyi gonvnyi mvnvrinv nvla

ngoogv nyi vdwa kavtav modubv mvre; okv chimapamu nvgv diringmooku am ngonugv nyi vdwa haachi chimure.”

20 Okv vdww Aijaya ka hv mvngrw yayabv mintoku,

“Nga paanya duku oogv yvvdw nga mamabu vdww;

Ngo atubongv kaapa sumutvku oogv yvvdw nga tvvla rimabu vdwa.”

21 Vbvritola Pwknvyarnv Israel nyi vdwwgv lvk-wnglo minto, “ngo minam tvvmanv nyi vdwa okv ritormintor sinv vdwa ngoogv laakkv ijo tvkula laarwk sidubv vla ngo vdwnv alugo doya dvdvto.”

11

Pwknvyarnv gv ayanamv Israel lo doonam

¹ Ngo tvvkadunv, Vbvrikunamv: Pwknvyarnv ninyigv atubogv nyi am tulatua supv kunvre? Maa vdwwloka tua mare! Ngo kadv Israel lo nyi ngv, Abraham gv husi lokv, Benjamin aralo vpin gonv lokv. ² Pwknvyarnv atubogv nyi am tulatua sula rimapvnnv, oogv atuake lo gakchola rinam vdwa. Elija gv Pwknvyarnv gvlo Israel vdwwgv lvkwwnglo dinchi rungbv kumnam

am Darwknv kitap arwnglo ogolo oguv vla mil-wkpvdw nonuno chindu: ³ “Ahtua, bunu vdvw noogv nyijwk vdwa mvki nyaroku okv noogv yogwngmvrwng vdwaka toyaktopak jitoku; ngo mvngchik doomwng dukunv, okv bunu ngaaka mvki dubv gwngnya duku.” ⁴ Pwknvyarnv oguvla ninyi mirwk jitoku? “Oogv jvjvmanv baal vnam Pwknvyarnv nga kumabv doonv hejar kanw nyi blvgo ngo gvbv vvchingvmu pvvtoku.” ⁵ Vjaka oogv aingbv: Vkvlgavbolo ninyigv anyuaya lokv okaka Pwknvyarnv gv gakdam pvla kayu pvnamv meechinggo doodu. ⁶ Ninyigv anyuaya lokv hv gakdunv, bunu ogugo ridudw ho rinam lokv rima doonv. Holvgabv Pwknvyarnv gv gaknamv nyi vdwg rinam am ogugo ridudw, vbvrikubolo ninyigv anyuaya ngv jvjvklvnv ayabv riku madu kunv.

⁷ Vbvrikubolo ogubv rireku? Israel gv nyi vdvw oogv lvgabv kaakarto vbvrijvka bunu mapa kuma toku. Pwknvyarnv gv yvnyi gakpvdw vv mvngchik nyitwng twngching gonv paamwng toku; ho kvvbi vdvw Pwknvyarnv gv goknam am ronji kunvbv rinya toku. ⁸ Darwknv kitap vbv mindu, “Pwknvyarnv bunugv tuktum okv haapok am pvcha dubv mvtoku; silu lodvbv bunu tvvla madunv okv kaapa madunv.” ⁹ Okv Dabid minto, “Bunu vdwa laatung riku okv bunugv dvmintvngmin kolo kuplwk laariku; bunu vdwa gilv moriku, bunu vdwa mvritririt lariku!” ¹⁰ Bunugv nyik am nyikmv molaka vkvlgavbolo ho bunu kaapa nyola madu kubv.” Okv bunua dvbvdwki bv ad-

11:3 1Dv 19:10,14

11:4 1Dv 19:18

11:8 Det 29:4; Aij 29:10

11:9 Miri 69:22,23

wkaku gv arwnglo doomu toka.

¹¹ Ngo tvvkadunv, vbvrikubolo: vdwlo Jius vdww dwktup kubvdw, bunugv dwktup pakulo bunu gilv ngopvkui? Vbv lokvma! ogulvgavbolo bunu rimur duku, vkvlvgabv turnamv Jentail lo aaduku, Jius vdwa bunua kavtav modu. ¹² Jius vdwgv rimur namv nyiamookulo achialvbbv boktalwkji la laalwk toku, okv bunugv yalu lo heema kunamv Jentail vdwgvlo achialvbbv boktalwkji la laalwk toku. Vbvrikunamv, vdwlo Jius nyi vd-waka aatala rita kubolo boktalwkji kunamv vdw-gobv kaila rireku!

Jentail vdwa ringlinbaalin kunam

¹³ Jentail vdwa ngo nonua vjak mindung dunv si: Ngo Jentail lo Apostol ako bv ribvdobv ridw, ngoogv atubogv kudungkua lo ngo goosure. ¹⁴ Lvkonyika ngo atubogv nyi gv lokvya kavtav dubv mvla nyola ridw okv vbvridula bunua achok godaka turmu nyola modubv vla. ¹⁵ Holvgabv bunu vdwlo tulatua kubvdw, ho kvvbi nyi mvnwng ngv Pwknvyarnv gv nyiru la rikunam lokv angusibv mvngdar lakula ajin bv ritoku. Vv oguaingbv rireku, vbvrikubolo, vdwlo bunu laarwk sirekudw? Vv sinam gv lvgabv turekudw!

¹⁶ Vtwng gv patung achok go Pwknvyarnvnyi jichobolo, vbvrikubolo vv vtwng mvnwng ngv ninyigvbbv ridukunv; okv singnv nvgonyi mi-ami am Pwknvyarnvnyi tamji bolo, akda vka ninyigvbbv ridukunv. ¹⁷ Olib singnv gv akda nga twngla twngnga bolo, okv mootum gv olib singnv akda vv vktur sidukunv. Nonu Jentail nyi vdwv oogv mootum lo doonv olib singnv aingbv ridu,

okv nonu Jius vdwgv maatar bv darwkchongjor jvnnv turnam baago bv ridukunv. ¹⁸ Vkvlgabv nonu oogv akda dartungnv aingbv rin vdw tvvlik la riyoka. Nonu oguaingbv kai mvngsu nyola nvpv? Nonu akda daagv aingching bv rimwng dunv; nonu miami am vngdwng momado—miami vv nonua vngdwng moduku.

¹⁹ Vbvrítola nonu mire, “um vmabvdv, vbvrítola akda ngv darmwkdarmak moroku sum ngoogv lvgabv dooku mvnv dukubv.” ²⁰ Vv jvjvrung. Bunu palin la paa duku ogulvgavbolo bunu mvngjwng marung jidu, nonugv mooku hoka doori lo ogulvgavbolo mvngjwng yala ridu. Vbvrítola nonu holvgabv kai mvngsu yoka; vbvmabvya, busula ritoka. ²¹ Pwknvyarnv Jius vdwa vbv kayu mabv rito, klugv oogv singnv akda doodung sinv aingbv rinv aka; nonuno vbv hv nonua kayu invpv mvngdure? ²² Ngonu kakakunamv Pwknvyarnv vdwgo aya nvgobv okv akortor rung nv gobvka ridu. Oogv yvvdw gilú dukunv um Pwknvyarnv holvgabv akortor dukunv, vbvrítola nonua aya duku—nonu ninyigv aya nga dubv mola riyidw. Vbvrítola nonuno doomu la rima bolo, nooka vbvching darmwkdarmak la darra rikunvpv. ²³ Okv vdwlo Jius vdwv bunugv mvngjwng manama kayu kubolo, bunu kvvlo ogolo ridudakdu kudw ho bunu vdwa laakur reku; holvgabv Pwknvyarnv vbvka riladubv gwllwk vv doodunv. ²⁴ Jentail vdw nonuno oogv mootum lo olib singnv akda dartungnv aingbv ridunv okv vbvrikunamv, vbv klu akdung bv rimanv, vv rongo mvngit nam olib singnv ho vksit sidunv. Jius vdwv soogv rongo mvngit nam

olib singnv bv ridu; okv Pwknvyarnv gv lvgabv olib singnv akda darkunv um atubogv kvvlogv singnv aingbv mvdukubv vksit sipu yala ridunv.

Pwknvyarnv gv ayanamv mvnwng gvlo doonam

²⁵ Jjv rungnv go arwng hoka doodu, ngokv ajin vdvw, oogv nam ngo chimuso mvngnam go, holvgabv so si nonua kairungbv chinvpavn go vla mvngsu momare. Si vbvridunv si Israel nyi vdwg mvngdin lamanv doonamv doobv kumare, vbvрилachin anyungjvngaku Jentail nyi vdvw Pwknvyarnv gvlo aangam ma daadwbv doodvre. ²⁶ Okv si ogubvrijvka Israel mvnwng ngv ringlin rikunv. Vbv Darwknv kitap mindu, “Ringnv ngv Jayon lokv aare

okv Jakop gv haatar lo alvmanv dvdv nga mvlamva riku.

²⁷ Ngo soogv milvpvvnam sum bunua pvvjire vdwo ngo bunugv rimur am laapak jire kudw.”

²⁸ Ogulvgavbolo bunu alvnnv yunying nga tulatua nyadula, holvgabv Jentail vdwg lvgabv jius vdvw Pwknvyarnv gv nyiru bv ridu. Vbvрилachin bunu Pwknvyarnv gv gaknam bv ridunv ogulvgavbolo, bunugv abuapa vdwg lvkwnglo bunu Pwknvyarnv gv ajin bv silu lodvbv ridu. ²⁹ Holvgabv Pwknvyarnv yvnyyi hv gakdam lvjv pvkudw okv boktalwkji pvkudw um vdwloka ninyigv mvngnam am mvngkap mvngngv kuma dunv. ³⁰ Jentail vdw nonuno lvgabv mimbolo, kvvlo atuake lo Pwknvyarnv gv minam am nonuno tvvmabv rito; vbvritola nonuno vjak Pwknvyarnv gv aya

nga laarwk sila riduku ogulvgavbolo Jius nyi vdww Pwknvyarnv gv gaam am tvvma kunam lvgabv. ³¹ Oogv apiabv, aya nama nonuno laarwk sipaduku ogulvgavbolo Jius vdww vjak* Pwknvyarnvnyi tvvku manam lvgalo, vbvrinam aingbv bunuka vjak Pwknvyarnv gv aya nga laarwk sipa laduku. ³² Holvgabv Pwknvyarnv vjak minam tvvmabv doonv vdwa patwk arwng lo doonam jvbv mvtoku, vkvlgavbolo bunua mvnwng nga Pwknvyarnv gv aya nga kaatam pvkunam lvgabv mvto.

Pwknvyarnvnyi hartvnam

³³ Pwknvyarnv gv nyitv ngv vdwgo kairungdu! Ninyigv mvngkimvnglak okv chinampanamv vdwgo arwng dukudw? Yvka mirimimpa sila jinyo ridw? Yvka ninyigv lamtv nga mvngchin nyolakre? ³⁴ Darwknv kitap vbv mindu,

“Yvvdw Ahtu gv mongrumara nga chinyu redw?
Yvvdw ninyia tamsar minsu lajinv?”

³⁵ Yvkvudw ninyia ogugo jimi sila kujinv,
vkvlgavbolo hv um jirwk sila dukubv?”

³⁶ Holvgabv ogumvnwng ngv ninyigv pwknamyarnamv, okv ogumvnwng ngv ninyigv lokv turdunv okv ninyigv lvgabv. Ngonu Pwknvyarnvnyi hartvbamtv ribv lajuka! Amen.

12

Pwknvyarnv gv kudungkua lo turnam

¹ Vkvlgabv, ngokv ajin vdww, ngonu gvlo Pwknvyarnv gv kairungbv aya nam lvgabv ngo

* **11:31** Kvgonv Kitap lo kaamadu vjak. **11:33** Aij 55:8
11:34 Aij 40:13 **11:35** Job 41:11 **11:36** 1Kor 8:6

nonuam lvbu dunv: Nonuno atubonga Pwknvyarnv gvlo turdubv erinlwksu toka, tulwksula ninyigv kudungkua lo rila okv ninyia mvngken mootoka. Sibv nonuno ho tulwksula rirungnamv jvjv rungnv kumnamjonamv. ² Nyiamooku kaaputain gv ridungdodung nga lvkin gobv ribandobam mabvka, vbvritola nonugv mongramara lokv mvngdin gvrikula Pwknvyarnvnyi ogumvwnwg nga arwng lokv mvdwk mooto kuka. Vbvrikubolo Pwknvyarnv gv mvnglwka— alvnnv ogudw, ninyia mvngpu monama okv rvbwngching monama um nonu chinreku.

³ Okv Pwknvyarnv gv anyuaya rungnv amin am ngo gvlo jinam lvgabv ngo nonu mvnwnwg nga mindunv: Nonu ogu nvgobv risovngso mvngdudw um lvvya yabv nonuno atubongv kaiyabv mvngbo suyoka. Vbvmabvya, nonugv mvngnamv tapvtalv bv mvngtoka, okv Pwknvyarnv gv mvngjwng dubv jinam ho nonuno atubongv jwngkadaka sutoka. ⁴ Ngonugv aw akin lo angu angusibv nanababa go doolindu, okv oogv nanababa mvnwnwg ngv atu atugv adung lo rinampanam am risudosu dunv. ⁵ Oogv apiabv, ngonuka achialv gobv nyiv rijeka, vbvrijvka ngonu kristo gvlo adwn dinkin gobv ridu, okv oguaingbv adwn dinkin lokv angu angusibv rinngv akin gobv ridudw oogv apia bv ngonuka angu angusinv ngv akin gobvku ridukunv. ⁶ Vkvlvgabv oogv Pwknvyarnv gv aya jikunam angu angusinv amin gv lokv atu atugv ridung lo ngonu risudosu tvka. Pwknvyarnv gv doin am ngonu

mila jidubolo, ngonugv mvngjwng namgv lokv ngv ngonu minto laka. ⁷ Riji rungduv ridubolo, ngonu riji rungtoka, tamsarkinu dubv ridubolo, ngonu tamsarkinu jirung tvlaka; ⁸ Si kvvbi am mintvmiru minsu dubv ridubolo, ngonu rirung jidu bv ritoka. Yvvdw kvvbi am jila nyodubolo, vv jirung toka; yvvgvlo tujupkunam bv ridudw um dinchi rungbv rirung jitoka; yvnyi aya nga kvvbiya kaatam nyola dubv jipvdw, vv mvngpu gvrila kaatam rungduv rirung tvka.

⁹ Pakmi sinama dinchi alvv ritoka. Rimur namv ogudw vkvnv um kaanwng mabv ritoka, alvv ogudw um gakbwngla ritoka. ¹⁰ Kristan bv rirung dubolo agurusok bv pakmi sitoka, okv ajin anyingnga mvngdv minsu dubv kaatamritam nwnngmi sutoka. ¹¹ Kudungkua nga rai tvlaka okv kamdung yoka. Pwknvyarnv Ahtu gv kudungkua nga haapok lokv dinchi rungbv ritoka. ¹² No mvngtin sinamv nam mvngpu gvilaka, noogv hirukaya nama saktv gvto laka, okv dvbvdwkibv kumbv tvlaka. ¹³ Noogv heemanv ajin kristan vdwa yikungyira nga orpinorin sitoka okv nyen am noogv naam lo aadu bv mvkuk jitoka.

¹⁴ Yvvdw nam mvdwkmvku dudw Pwknvyarnv gvlo vkgv lvgabv aya gnv boktalwkji dubv kumji yatoka—vm, ninyia boktalwkji dubv kootoka, beema bvka. ¹⁵ Yvvdw himpudw um himpu minggv tvka, yvvdw kapdudw um kaaming gvto. ¹⁶ Mvnwng gv lvgabv akinching bv mvngto ritoka. Kaimvngsu mabvka, vbvri-

tola angam bv kudungkua laarwk sitoka.* Nonu atubongv chinvpanv bv mvngsu yoka.

¹⁷ Nyigonv nam rimur dubolo, ninyi gvlo rimur ngurv dubv riyoka. Mvnnwng gv albv mvngnama um ridubv gwngtoka. ¹⁸ Mvnnwng gv lvkobv sarsopoyo bv doobamdakbam nam lvgabv nonu gvbv ogumvnnwng nga vdowngo rila pvdw ritolaka. ¹⁹ Vdwloka mvrwk siyoka, ngokv ajin vdwv, vbvritola vbvmayabv Pwknvyarnv gv haachia um rimu toka. Holvgabv Darwknv kitap vbv mindu, “ngo mvrwk sire, ngo rirwk sireku, Ahtu vbv mindu.” ²⁰ Vbvmayabv, Darwknv kitap vbv mindu: “noogv nyimak vv kano dubolo, bunua dvnammv dvmu tvka; bunu tvngnwng dubolo, bunua tvngnamgo tvngmu tvka; holvgabv so vbvrinam lokv bunua hinying bvku vmv gov gureku.” ²¹ Alvmanv nga rigam koyoka; vbvmayabv, alvnam lokv alvmanv nga riya yatoka.

13

Istet tujupkunam vdwgv kudungkua rijinam

¹ Nyi mvnnwng ngv istet tujupkunam gv gaam am tvvdubv rirungdunv, okv ogulvgavbolo Pwknvyarnv gv tulwknammv kaama bv istet tujupkunammv lo rima dunv, okv tujupkunammv Pwknvyarnv gv lokv aadunv. ² Tujupkunammv sum yvvdw tulwkmabv riya dunv vv Pwknvyarnv gv ogugo orto jidudw um tulwkmabv ridunv; okv yvvdw vbvridunv hv atubonga jwngkadaka kolo

* **12:16** angam bv kudungkua laarwk sitoka; Vmalo rvngammv nyi ajin bv laarwk sitoka. **12:19** Det 32:35 **12:20** Nyit 25:21,22

laalwk sureku. ³ Holvgabv yvnbunudw alvn-
 vbv ridunv hv rigvdogvnnv vdwa busunam kaama
 dunv, vbvritola yvvdw alvmanv bv ridunv vv
 busu gvvdubv ridu. No oogv tujupkunam um
 busumanam gobv ridubv mvngdunvre? Vb-
 vrikubolo alvnnv ogudw um ritolaka vvkubolo
 nam bunu hartv reku, ⁴ogulvgavbolo bunu Pwkn-
 vyarnv pakbu bv rinam lvgabv noogv atubogv
 alvnam lvgabv ridung dunv. Vbvritola nonuno
 alvmabv ribolo, vbvrikunamv nonuno bunua
 busu toka, ogulvgavbolo bunugv jwkrwv jvjvklv
 mvrit kunam bv ridunv. Bunu Pwknvyarnv
 gv pakbu bv ridu okv yvvdw rimur dunv um
 Pwknvyarnv gv mvritririt nnnv nga mvnvrinv
 do. ⁵ Holvkwng bv tujupkunam vdwgv gaam am
 tvvrung tvka—ogulvgavbolo vv Pwknvyarnv gv
 mvrit jinam lvga mvngchikma, vbvrinamv noogv
 haapok lokv nonu omkv mvngnam lvgabv ridunv.

⁶ Svkv gv lvgabvka nonuno ogubv lampu dor-
 dunv, ogulvgavbolo tujupkunam vdww vdwlw
 kudungkua nga rijabrigap la rinamv bunu Pwkn-
 vyarnv gv lvgabv ridunv. ⁷ Vbvrikubolo, Dortoka,
 bunua ogugo dorsvgo doodubolo, bunua dortoka
 atubonga okv yikungyira nga dorji nvnga dortoka
 okv bunu mvnwng nga mvngdv okv paknama
 kaatamla ritolaka.

Ajin anyingnga kudungkua riji minsunam

⁸ Yvv gvka kudungkua dvdu arwnglo doyoka—
 nonu gvlo kudungkua dvdu ngv ajin anyingnga
 pakmisinam yangv mvngchikv. Yvvdw vbv tvvla

ribuv vv Pvbv nga tvvdunv. ⁹ Gamki kunam si vbv mindu, “yokarchokar yoka; gwngrw gwkyoka; dvcho choyoka; kvvbigv oguogu doonam am kav yoka”—so mvnwnv dvdv nga, okv oguogu kvvbi gvgo gujeka, mvnwnv nga si miyominchikla gamki kunam arwng lo gamkin gobv mindu, “nonuno atubongv oguaingbv paksu dudw vbvching namrwksuku aka pakmi sitoka.” ¹⁰ Vdwlo nonu kvvbiya pakredw, vdwloka um nonu rimur dubv rimare; paknamv, vbvrikubolo, Pvbv minam dvdv nga tvvnnv gobv ridukunv.

¹¹ No sum vbvrirung laka, ogulvgavbolo sum chinto laka nonugv yupnam lokv udwv noogv lvgabv aadu kunv. Vdwlo ngonu mvngjwng choto kudw um kaiyabv ngonugv ringlin kunamv nvchi dukunv ¹² Kanv ngv vjvda vngbo dariku, pua ngv si takloyangv ungrap tvvduku. Kaju ngonu kanv lokv soogv ridungdakdung dunv sum kayu lakuju, okv Kaju ngonu pualo nyimak rimisinv dukubv idugo laala kujuka. ¹³ Kaju ngonu atubongv rvbwngching bv rigv laju, alu loung lo doonv nyi gv aingbv—tvngkium kiamnv gobv riyoka, gwngmursingmur yoka, yalungyachung duyoka okv kavtav nvbv riyoka. ¹⁴ Vbvritola Ahtu Jisu kristo gv idu am laatoka, okv noogv rimur ridung sum okv hang nyumchi dubv mvngnam am kayu tokuka.

14

Kvvbiya jwngkadaka yoka

13:9 Mog 20:14; Det 5:18; Mog 20:13; Det 5:17; Mog 20:15; Det 5:19; Mog 20:17; Det 5:21; Leb 19:18

¹ Yvvdw mvngjwng lo kwngkwng yoma dunv oogv vdwa turwk sitoka, vbvritola bunugv lvkobv atubogv mvngnam lo bunua larmi siyoka. ² Kvvgo nvgv mvngjwng lokv ogumvnwng nga bunua dvmu ladu, vbvritola yvvdw mvngjwng lo kwngkwng madunv um ujiuu mvngchik ka dvmwng dunv. ³ Yvvdw ogumvnwng nga dvdvdv bv dvla redw oogv nyi vdvw dvla nyomanv um mina jima bvka; okv ogumvnwng nga dvla nyoma bv ujiuu mvngchik ka dvmwngny nyi vdvwka dvdvdv bv dvnv umka nachunachv la jwngkadaka jiyoka; ogulvgavbolo ho nyi umka Pwknvyarnv laarwk sidunv. ⁴ Kvvbi gugv pakbu bv riyavngya dunv vdwa um jwngkadaka yadunv nonuno yvvla? Bunua rijik dolo rijik madulo kaajitaji nvgv bunugv atubogv Atuv kaasure. Okv bunu vdvw rijik rungre ogulvgavbolo Ahtu bunua rijwk dubv jireku.

⁵ Nyi meegonv mvngdu daadwvrw aluv kvvbi alua kaiyago alv yadunv, okv kvvbi vka mvngdu kuring alu dvdv ngv lvyin bv ridu. Ngonu mvnwng atugv mongramara lo mvngnam am asar rungbv takdamvra mvngmi sidubv rirungdu. ⁶ Yvvdw alugunyi daadwvrw bv dinchi rungbv mvngdunv vbvrvnv vv Ahtu gvlo mvngging la ridunv; yvvdw ogumvnwng nga dvnam kamabv dvredw vv Ahtu gvlo mvngging la ridu, ogulvgavbolo bunu dvnam lvgabv Pwknvyarnv gvlo umbonyikv vla mindunv. Yvvdw daadwvrw bv ogumvnwng nga dvdvdv bv dvmabu vv ka Ahtu gvlo mvngging la ridunv, okv vv bunuka Ahtu gvlo umbonyikv vla mindunv. ⁷ Ngonu atubogv

mvngchik lvgabv singsu madunv, okv ngonu atu mvngchik lvgabv sisu madunv. ⁸ Vdwlo ngonu turjvka, Ahtu gv lvgabv ngonu turdunv, okv vd-wlo ngonu sijvkuka Ahtu lvgabv ngonu siji dunv. Vkvlgabv ngonu singjvka okv sikujvka, ngonu Ahtu gvloku ⁹ Holvgabv kristo sitoku okv turkur toku, vkvlgavbolo turnv vdwgv okv sikunv vdwgv Ahtu bv ridukubv ridu ¹⁰ Nonu vbvriku-namv, yvvdw ujiuu mvngchik ka dvmwng dunv—ogubv nonu kvvbia jwngkadaka la kabokaalwk dunv? Okv nonuno ogumvnwng nga dvnamdvsu dvnv ngv—ogubv no kvvbi mvngjwng nvnga miyakaya jila ridunv? Ngonu mvnwng nga Pwknvyarnv gv kaagelo dakmu tvla ninyigv lokv jwngkadaka reku ¹¹ Holvgabv Darwknv kitap vbv minjidu,

“Vbv dvdvbv turnv Pwknvyarnv ngo, Ahtu mindu,
 mvnwng ngv ngoogv kaagelo lwbwng kumpvre,
 okv mvnwng ngv mingkuk reku ngo vkvgv Pwknvyarnv ngv.”

¹² Vbvrikunamv, ngonu mvnwng ngv, Pwknvyarnv gvlo rinamdaknam dvdv nga minji dubv ririku.

Kvvbiya obikpalik dubv mvyoka

¹³ Vkvlgabv, kaju ngonu kvvbi ajinanyingnga jwngkadaka minsu kuma bvjuka. Vbvmabvya, nonuno kvvbi gv ogugo rimur kubvdw umya mimbwk jila mindin jiya nvbv riya svngvka.

¹⁴ Ngoogv Ahtu Jisu gvlo akin gobv rinam lokv

dadwvrw bv ogunv dvnam dvdvvgv vv arwanyu kuma dubv mvroku; vbvritola vdwlo no dvnam kvvgo nvnga darwk mabv mvngdu bolo, vbvri-bolo oogv dvnam vv nonugv lvgabv darwk mabv rire. ¹⁵ Vdwlo oguogu dvnam lokv nonu kvvbiya mvngru modu bolo, vbvrinamv nonu paknam lokv paksu minsu dubv gwngmadu. Kristo gv oogv nyi lvgabv sijikunam um noogv dvnam lokv um simungoomu jimu yoka. ¹⁶ Nonuno ogugo mvngdv kodubv vbv alvbv risvnga alv-manv amin akobv mvngku yoka. ¹⁷ Pwknvyarnv gv karv lo dvmintvngmin dubvma, vbvritola dar-wknam, sarsopoyonam okv oogv Darwkvn Dow lokv himpu dubv jinamv. ¹⁸ Okv vdwlo nonuno so lamtv lo kristo gvbv ridunv, vv nonuno Pwkn-vyarnv nga mvngpu modubv ridu okv kvvbi vd-gwvlo ka tulwk kodubv ridu.

¹⁹ Vkvlgabv ngonu rungkirunglak kibv tvlaka* ogugunv ngonua sarsopoyo nga aamunv okv hv gwlvk lokv ajin anyingnga ridur minsu dubv. ²⁰ Ngemu dubv rimabvka, dvnam tvngnam lokv, ogugo Pwknvyarnv gvbv ripvkudw. Dvnam mvnwng nga dvlado, vbvritola Kvvgonv nga ogumvnmwng dvnam lo dvmur la obikpalik mod-ubv ridubolo vv rimur bv ridu. ²¹ Adwn dvn-am, opo tvngnam okv kvvbi ajin mvngjwngnv vdwa gilv dvbv vkvvnv rinam lokv adu sinamv alv bv rijik namv. ²² Vbvrikunamv soogv lv-gabv ogugunyi mvngjwng pvdw, nonu atubogvla okv Pwknvyarnv gv pingkolo pvvtoka. Hv ogu

* **14:19** Ngonu rungkirunglak kibv tvlvaka; Kvvgonv kitap lo vbv dooduNgonu rungkirunglak tvlvaka.

ogugo rila dunv ritola jwngkadaka jvka rigakpanam go himpa mabv ridunv hv mvngpuv!
²³ Vbvrítola vdwló bunu ogugo dvdudw holvgabv bunu mvngngum ingla ridubolo, Pwknvyarnv bunua miyakaya dunv vdwló vv bunu um dvredw, ogulvgavbolo vkvgv rinamdoonam lo mvngjwng jwnggrw panam lo kamadu. Okv vbvrinam si ogugo rijvka mvngjwng kolo rimabv rinam si rimur ngv.

15

Kvvbi yanga mvngpu motoka, nonu gvbv mvngsu yoka

¹ Ngonu yvvdw mvngjwng ngv vngdwnɡ dunv vdww vngdwnɡ manv vdwa bunugv vge nga gvvdur minggv dubv ridunv. Ngonu atubongv mvngchik mvngpu dubv risu nyom yoka. ² Vbvmayabv, ngonu mvnwng ngv kvvbi kristan vdwa mvngpu morung lajuka bunua atubogv alv kunam lvgabv bunua mvngjwng lo vngdwnɡ mokunam lvgabv. ³ Kristo ninyi atubongv mvngpu dubv mvsu mato. Vbvmayabv, Darwknv kitap vbv mindu, “Minyingmiru go maanying jvbv nonua minam vdww vjak ngo gvlo gwlvk duku.” ⁴ Ogumvnwng nga Darwknv kitap lo lvklwk kunam ngv ngonua tamsar dukubv lvklwk toku, Darwknv kitap gv ngonua saktv nga okv mintvmiru nga jinam lokv ngonu mvngtin go paadukubv. ⁵ Okv Pwknvyarnv gv, saktv gvnnv okv mintvmiru gvnnv gv lingkku agungamia ngv, vbv mvngnam gamdung akin lo rila jinv vv nonugv

pingkolo Jisu kristo gv apiabv riringrima jinv ngv doolwk yilakv vdunv, ⁶ vkvlvgabv nonu mvnwng ngv dookumdopa tvla ngonu Ahtu Jisu kristo gv Abu Pwknvyarnvnyi lvkin gobv gaambv akin bv hartvbamla rinya laka.

Jentail vdwlo gamlv minjinam

⁷ Akonv ajinanyingnga turwk minsulaka, vbvrikunamv, Pwknvyarnv gv lvgabv hartv nvdubv, ogu aingbv kristo nonuna turwk sipvkudw. ⁸ Holvgabv nonua ngo mindunv kristo gv singdungridung gv kudungkua ngv jius vdwgvbv, Pwknvyarnv dinchi runggbv oogv mvngjwng nga kaatam dubv, bunugv abuapa vdwa milvpvkvunam am jvjvrungbv riji rungdbv aaji toku, ⁹ okv vbvrila Jentail nyi vdvwka Pwknvyarnv gv anyuaya lvgabv hartv la rila minggv dukubv. Darwknv kitap v vbv mindu, “okv vkvgvlvgabv Jentail vdwgv peelvbv lokv ngo hartv dunvkv;

ngo nam mirimimpak bv mila hartvre.”

¹⁰ Okv minta dunv

“Mvngpu minggv tvvlaka, Jentail vdvw, Pwknvyarnv gv nyi vdwgv lvkobv!”

¹¹ Okv lvkodv mindv dunv,

“Jentail mvnwng ngv, Ahtunyi hartv tvlaka; mvnwng gv nyi vdvw, ninyia hartv tvlaka!”

¹² Okv lvkodv mindv dunv, Aijaya mindu,

“Jesse gv opi nga kaatamre; hv aagv rila Jentail vdwa rigvre,

15:9 2Sam 22:50; Miri 18:49

15:10 Det 32:43

15:11 Miri

117:1 **15:12** Aij 11:10

okv bunu mingtin la ninyigv aralo bunu vdwv doore.”

¹³ Pwknvyarnv ngv mvngtin jikugv kolv lvrwv, nam mvngpu namv okv sarsopoyonamv noogv mvngjwng lokv ninyigv aralo bokta jila doilakv vdunv, vkvlgavbolo noogv mvngtin namv Darwknv Dow gv jwkrw lokv kaiyaya molaka.

Paul gv vbv busukano kamabv lvkdungnam

¹⁴ Ngoogv ajin vdw: Ngo awv hinrungdo nonugv ho alvnam mvnwng ngv akomaring doonyado, vkvnv vv nonu gvlo chinampanamv, okv vkvnv ajinanyingnga tamsar minsu ladu. ¹⁵ Vbvrítola soogv siti so mindwmiying jidunv si ngo gvlo busukano namgo kamabv minchar svgo doonam lvkwnglo lvkodv mindv jidunv. Ngo gvlo busukano namgo kaamato ogulvgavbolo Pwknvyarnv ngv ngam alvnnv dwa riduvngdu bv jitoku ¹⁶ Jentail vdwgv lvgabv riyavngya dubv kristo Jisu gv pakbu akobv rimuto. Ngo nyibu ako gv aingbv Pwknvyarnv gv lokv alvnnv yunying nga japgorigo kardunv, mingkulo oogv Jentail vdwv Pwknvyarnv gvlo erinlwksula laarwk sila dukubv, Darwknv dow lokv ninyi tulwklaklwkw sidukubv. ¹⁷ Kristo Jisu gv ara lo akin gobv, vbvrikunamv, ngoogv Pwknvyarnv gv lvgabv rijivngji dubv ngo kai mvngsu nyola dunv. ¹⁸ Jentail vdwa Pwknvyarnv gv mingkulo vngdubv Jisu kristo ngoogv lokv ogugo ngam rigvdogv dubv jipvdw holvga mvngchik ngo busukano kaama bv okv minji lare. Hv gvlo so vbvridunv si gamchar okv kudungkua rinamlo, ¹⁹ v jwkrw lokv okv kaasartabo nam lokv, okv

Pwknvyarnv gv Dow gv jwkrw lokv ritoku. Okv vbv, Jerusalem lokv Illyrikum lobv lamtv mvnwng lo mooying vngto, ngo kristo gv lkwng alvny yunying lkwnglo japgo karla ritoku. ²⁰ Ngoogv mvngdung lo mvngdam jenam ngv ogolochinglo Kristonyi tvvpa madudw ho ngo alvny yunying nga japgo kardubv mvngla mvngbvdu, nyi kvvbi gv lvngtung tunglwk makulo. ²¹ Vbv Darwknv kitap vbv mindu, “Yvv bunua ninyigv lkwnglo mimpa mapvkudw vv kaapare, okv yvnbunu tvvpa mapvdudw vv tvvchinre.”

Rom lo Paul gv vnglwk dubv rungam

²² Okv vbv, ngo nonugv ho vngdubv mvngla vdwo gwngkwng bvka vngmo paamabv rito. ²³ Vbvrilachin ngoogv so mooku sokv risvdaksv nga ngo vjak ringam tokubv okv vbv ngo anying meego nonua kaarwk sinam lvgabv mvngkwng kunama, ²⁴ vbv vjak ngo kaarwk siku nvpv mvngla mvngtin dukunv. Ngoogv Spein bv vngtv rinyi lamtv lo ngo nonua o kaapa minsu lareku, okv o aala nonua kaarwk sila giobamnyarbam nam kokwng loku, hoka alo vngnam lvgabv nonugv lokv ngo lamtv lo kaadurtadur konvvpv mvngla mvngtindunv. ²⁵ Vjak daadw, ogubvrijvka, Pwknvyarnv gv ninyia kudungkua ridumripala rigurvnggur dubv Jerusalem alo ngo vngtv dunvka. ²⁶ Holvgabv Mesedonia okv Akaia ara gv gvrja ngv Jerusalem lo doonv Pwknvyarnv gv nyi Nyimayeema bv rin vdw jinyo bv jidurridur

dubv vla doopam doola japnia rinia toku. ²⁷ Oogv japnamrinamv bunu awgv mvngnam lokv jap-toku; vbvritola, jvjv bv vbolo si, bunu vdwgvlo ayala bunua rigurvnggur rungsvgo doodu. Holvgalo Jius vdwv bunugv boktalwkji kunam a orpinorin sila Jentail vdwgv lvkobv jilwk jitoku, Jentail vdwv ikimora bokta jikunam vdwa jius vdwlo mvdurridur lo rinv rungdu kubv rirung duku. ²⁸ Vdwlo ngo so kudungkua nga ringam kubolo okv bunugv lvgabv urkum jinam morko dvdv som bunugv laklo laklwk jidaku, ngo Spein lvgabv vnglin reku okv hoka ngo nonuam vngpikla kaarwk sireku. ²⁹ Vdwlo ngo nonu gvlo aaredw, ngo chindu, kristo gv bokta jinam am ngo lvkobv akomaring namgo aagv jire.

³⁰ Mvngjwngnv ajin vdw, ngonu Ahtu Jisu kristo gv lokv okv oogv dow gv pakla jinam gv lokv: nonu ngoogv kumkulo Pwknvyarnv gvlo ngo lvgabv dинchi bv kungur minggv laka vla ngo mvngdunv. ³¹ Judia lo mvngjwng manv vdwgv laak lokv ogu guchin rimadubv okv hogv Jerusalem alo Pwknvyarnv gv nyi vdwv ngoogv rinamdoonam nga umbonyikv vla laarwk sila dukubv kumto laka. ³² Vbvribolo ngoogv haapokv hingam silaku nonu dookulo aare, vbvrinam si Pwknvyarnv gv mvnglwkw vbolo, okv nonu duku ho ngo harpu alvbv mvngriukla aareku. ³³ Pwknvyarnv ngv, ngonugv sarsopoyo jiku gv agongamia ngv, nonu mvnwng gv dookulo doom-ing gvi laka. Amen.

16

Paul gv kumrwk sila milwk jinam

¹ Ngo ngonugv anyibormv Poebenyi, kenkeria gvrja lo kudungkua rinu doonv alvnbv um ngo nonu gvlo tulwk jila minlwk jidunv. ² Ninyi Ahtu gv amin lo laarwk silaka, Pwknvyarnv gv nyi bv vbvriung gvri la, okv ogugo nonu gvlo mvdurridur svgo dubolo ninyi albv mvdur laka; vkvlgabv hv awv nyi meego alvnv ajin bv jintoku okv ngam ka ajin bv ritoku.

³ Ngo Prisilla okv Akuila bunyia, Jisu kristo gvlo ribam ajin bv ridunv ho anyia ngoogv kumrwksinam gaam nga jilwk dukunv; ⁴ bunu ngoogv lvgabv bunu singnam am sitamdurtam lwkto. Ngo umjvdv bunua umbonyikv mvngdu kunv—ngo tikma, vbvritola Jentail gvrja mvnwnv vka vbv albv mvngming gvdu. ⁵ Bunugv naam lo gvrja vngdam sinv vdw aka kumrwksidunv.

Kumrwksinam sum ngoogv ajin Epaenetus, Asia gv amin yunam kristonyi mvngjwng choyanv umka ngo jilwk jidunv. ⁶ Meri nyika, nonugv lvgabv rilv kumabv rijinv umka kumrwksidunv. ⁷ Andronikas okv Junia,* ngoogv patwk lvkobv doobam nam jius ribam ajin anyi aka kumrwksinam am jilwk jidu; bunu vdwv Apostol pingko loka albv chimisito okv kvvlo ngo ritvadv bv bunu kristan ritoku.

⁸ Ngoogv kumrwksinam am, ngoogv Ahtu gvlo kudungkua ribamnam ajin Ampliatusnyi jilwk-dunv. ⁹ Ngoogv kumrwksinam sum ngonugv

16:3 Nyim 18:2 * **16:7** Junia; VmaloJunias; Kvgonv Kitaplo Julia.

Jisu kristo lo ribam ajin urbanusnyi jilwkdu, okv ajin Stachys nyika jilwkdu. ¹⁰ Kumrwksinam am Kristo gvlo mvngtin siladunv Apelles nyika jilwk dunv. Kumrwksidunv yvvdw Aristobulus gv vpinvriap bv ridunv umka kumrwksidunv. ¹¹ Jius akingo ribam ajin, okv Narcissus gv oguara lo kristan bv rinv vdwa, okv Herodion nyika kumrwksidunv.

¹² Tryphaena okv tryposa, Ahtu gv kudungkua lo rinv, okv ngoogv ajin Persis, Ahtu gv lvgabv alv rungbv kudungkua rinv umka ngo kumrwksidunv. ¹³ Ngoogv kumrwksinam sum Rufusnyi, oogv Ahtu gv kudungkua lo rikirilak rungbv rinv, okv ninyigv anv, oogv ngam kuunyilo aingbv bv mvngdu ridunv umka ngo jilwk jidunv. ¹⁴ Ngoogv kumrwksinam sum Asyncritus, Plegon, Hermas, Patrobas, Hermas, okv kristan kvvbi lvkobv rinv bunu vdwaka ngo jidunv. ¹⁵ Kumrwksinamv Pilologus okv Juila, Nereus okv ninyigv anyibormv, Olympas okv Pwknvyarnv gv nyi vdwa lvkobv doonv bunu vdw aka jilwk dunv.

¹⁶ Ajinanyingnga sarsopoyo bv kumrwk sidula mopop minsulaka. Kristo gv gvrja mvnwng ngv nonua bunugv Kumrwksinam am jilwk dukunv.

Minyungminya bv minsar kunam

¹⁷ Ngo nonua dinchi rungbv mindunv, ngokv ajin vdwa: oogv yvvdw apinayin dubv rinam lvgabv okv nyi vdwgv mvngjwng nvnga mvngru modubv rinv okv oogv nonu tamsarnama laarwk silakula chincho kunam um miyakaya yala rinv vdwa um hinggukaagu sutolaka; okv

bunugv gv lokv adu la ritolaka! ¹⁸ Holvgabv yvvdw vkvnv ridunv v ngonu Ahtu kristo gvbv kudungkua ngam rimadunv, vbvritola bunu atubogv kipoayit lvgabv mvngmwng dunv. Bunugv tvvpukayin minam lokv okv mingkiammiriam laknam lokv chima pamunv nyi am kupdu. ¹⁹ Nonugv gamlv nga mvngdv kunam a mvnwng ngv tvvpa toku, okv vkvlgabv soogv lvkwnglo ngo nonua himpu sidunv. Ngo nonua alv nvngv ogudw um chingkikpakik laknv gobv ritola, vbvritola alvmanv dvdv ngv ogudw um chimapama nvbv ribolo um ngo alvbv mvngdunv. ²⁰ Okv Pwknvyarnv ngv, sarsopoyo gv lingkuv, ayongjemabv Uyudvbv am nonugv lvchu kampwk lo samtin more riku.

Ngonu Ahtu Jisu kristo gv anyuaya ngv nonua lvkobv dooming gvi laka.†

²¹ Timoti, ngoogv kudungkua ribam ajin ninyigv kumrwksinam sum nonua jilwk dunv; okv jius ajin Lucius ka, Jason ka, okv Sosipater ka nonua jilwk dunv.

²² Ngo, Tertius, soogv siti pota sum lvkya dunv, kristan kumrwksinam gv gaambv nonua sum jilwk jidunv.

²³ Gaius vnam ngoogv naam doosingku oogv naam lo gvrja vngdum siku, hv ka nonua kumrwksinam gaam sum jilwk dunv; Erastus, Pamtv hogv morko pvvyanv bv rinu, okv ngonugv

† **16:20** Kvggonv kitaplo soogv aba baangv si kaama. **16:21**
Nyim 16:1 **16:23** Nyim 19:29; 1Kor 1:14; 2Tim 4:20

achiboru Kuartus bunugv kumrwksinam somka nonua jilwkdu.‡

²⁴ Ngonu Ahtu Jisu kristo gv anyuaya ngv nonu mvnwng gvlo lvkobv dooming gvi laka. Amen.

Paul gv hartv la kumnyung kunam

²⁵ Kaju ngonu Pwknvyarnvnyi hartv laju! Hv nonugv mvngjwng nga, alvnnv yunying lo ngoogv mintam nam Jisu Kristo gv lvkwnglo okv klukuchu gv hvchingla dukunv jvrv rungnv arwng gaam nga kaatam la japji kunam lokv adwngchingbv turladakla dubv mvla dukunv.

²⁶ Vjak, ogubvrijvka, oogv jvrv nga turbwng jinv Pwknvyarnv gv gamki kolo nyijwk vdwgv lvklin jila rikunam lokv si mvnwng ngv chinlakula riduku, vkvlgabv ho mvnwng ngv mvngjwng laku okv tvvlaka riduku.

²⁷ Pwknvyarnv mvngchiknyi, oogv chinv mvnwng lo chinkik yachoknv, Ahtu Jisu kristo gv lokv ngv hartv lajuka! Amen. §

‡ **16:23** Kvvgonv kitaplo soogv verse 24 sum lvkpwngdo: Ngonu Ahtu Jisu kristo gv anyuaya ngv nonu mvnwng gvlo lvkobv dooming gvi laka. Amen: Kvvgonv soogv sum verse 27 kokwnglo lvkpwngdu. § **16:27** Kvvgonv kitaplo 25-27 lo doodu okv 14:23 kokwng loka lvkdu; Kvvbi gonv 14:23 lo mvngchik doomwngdu; Akin gonv bunua 15:33 loka doomudu.

ANWNV GAMLV

Tagin first Bible translation based on TEV (Good News)

copyright © 2018 The Word for the World International

Language: (Tagin)

Contributor: The Word for the World International

The New Testament in Tagin

Published as

ANWNV GAMLV

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

PDF generated using Haiola and XeLaTeX on 22 Feb 2024 from source files dated 15 Apr 2023

65e96bca-33d6-5dc6-a8ee-da485ecfb7ed